


SE BOIFENG, KE NNA

 A re feleng re eme nakwana le go inamiša dihlogo tša rena le dipelo pele ga Modimo. Gomme ge re sa ne dihlogo tša rena le dipelo di inamišitšwe, ke a makala ge eba go tla ba le dikgopelo, bošegong bjo, gore o tla nyaka Modimo go go gopola ka mo—mo mokgwa wo o *itšego* le bakeng sa selo se se *itšego*, ge go le, e no phagamišetša seatla sa gago godimo go Yena ka mokgwa *woo*. Bjale, O a kwešiša, O tseba mosepelo wo mongwe le wo mongwe, Yena ke mohlokamagomo. Bjale, e no boloka seo ka monaganong wa gago ge re rapela.

² Tate wa Legodimong, re tšea wo go ba wo mongwe wa menyetla ye megologolo ya bophelo bja rena, ke go tla pele ga Berekwa ba Madi a Gago, Kereke ye e tswetšwego gape ka Moya wa Modimo. Gomme bošegong bjo, ge re sa kgobokane mmogo Leineng la Morena Jesu. . . E boletšwe ke Yena, gore kae kapa kae ba babedi goba go feta ba kgobokanego Leineng la Gagwe, O tla ba magareng ga rena. Bjale, go swanetše go ba bjalo, O e tshepišitše.

³ Gomme ka gona re a rutwa gore ge letšatši le thoma go batamela bofelong, gore re se tlogele go kgobokana, renabeng mmogo, bjalo ka ba bangwe ba se nago tumelo, eupša re swanetše go kgobokana renabeng mmogo. Gomme re a rutwa gape gore re dula ka mafelong a Magodimong ka go Kriste Jesu, re kolobeleditšwe ka Mmeleng wa Gagwe ka Moya o tee. Gona re na le Yena, re tsogile le Yena ka tsogong ya Gagwe, le ka Bogoneng bja Gagwe, go tsebeng gore O . . . phela go ya go ile go dira dipoelano, gomme re a Go leboga bakeng sa se.

⁴ Gomme bjale bošegong bjo, Morena, go bile diatla tšeo di ilego godimo, O tseba se se bego se le ka tlase ga seatla sela ka pelong, ba swere kgopelo yela godimo ga pelo ya bona bjale, Modimo, ekwa gomme o ba arabele thapelo. Re a Go leboga gobane re ne tshepišo, gomme tshepišo. . . gomme tumelo ke netefatšo ka tshepišo yeo gore e tla fiwa bona. Phološa soulo ye nngwe le ye nngwe e lahlegilego, Morena, tliša morago mokgelogi yo mongwe le yo mongwe, fodiša motho yo mongwe le yo mongwe a babjago, Morena, hwetša letago go Wenamong.

⁵ Go robetše pele ga rena mo bjale ke disakatuku, mašela, Dibeibele. Bjale, re a rutwa ka Beibeleng gore ba tšere go tšwa mmeleng wa Mokgethwa Paulo disakatuku le dithethwana, meoya ya ditšhila e tšwetše ka ntle ga batho, malwetši a bile, ba ile ba fodišwa. Bjale, re a tseba gore ga se rena Mokgethwa Paulo, eupša O sa le Modimo wa go swana, Jesu wa go swana.

⁶ Gomme gape, re boditšwe nako ye nngwe moo Israele e bego e le tseleng ya yona go ya nageng ya tshepišo, Kereke ye kgolo ya

Modimo e biditšwego go tšwa Egepeta, gomme tseleng ya yona, thwi ka tseleng ya mošomo, Lewatle le Lehubedu le ba ripile go tloga nageng. Modimo o lebeletše fase ka Pilara yela ya Mollo ka mahlo a go befelwa, se sengwe se be se eme ka tseleng ya bana ba Gagwe go ba thibela go tshepišo, lewatle la tšhoga, le tokološeditše maphotho a lona le meetse a lona morago, gomme Israele e kgabaganyeditše mošola godimo ga naga ya go oma.

7 Bjale, O Modimo wa go swana yoo a bilego le Moshe, Pilara ya Mollo ya go swana, Modimo wa go swana. Bjale, ge O lebelela godimo ga dika tše, Morena, ge di beilwe godimo ga batho ba go babja, Modimo, e sego ka Pilara ya Mollo, eupša ka Madi a Jesu lebelela fase gomme o tsebe gore ka megogoma ya Gagwe ba fodišitšwe.

8 Gomme O boletše ka Lentšung la Gago, “Ka godimo ga dilo tšohle Ke rata gore le atlege go phelegeng.” Gomme a nke maatla a Sathane ao a ba ripilego go tloga go go phelega mo gobotse, a nke a tšhoge le go šuthela kgole, gomme a nke ba kgabaganyetše mošola ka go naga yela ya go phelega le maatla, le go phela ba thabile mo, ba direla Modimo. E fe, Morena.

Etla bošegong bjo ka maatla a magolo, sepela godimo ga rena ge re kokobetša dipelo tša rena pele ga Gago. Leineng la Jesu Kriste, re a e kgopela. Amene.

9 Le ka dula. Morena ka mehla a le šegofatše. Ke sa tšwa go kwa semmušo, morago ga sekgalela se, ka difihlolo tša bodiredi mosong, gomme ke thabetše sebakabotse se go kopana le baena le go ba le kopanelo ye e itšego. Le a tseba, go na le se sengwe ka go ja seo se tlišago kopanelo. Ga ke tsebe gobaneng go le, eupša go no—go no e dira; go tliša kopanelo.

10 Gomme Beibele e a re botša, gore ge Jesu a be a no ba kgauswi le go tloga go tloga bophelong bjo go ya ka go Dikgao tša Gosafelego tša bašegofatšwa, O be a nyaka go ja le barutiwa ba Gagwe, gomme O hlaotše kamora ka seprofeto sa Gagwe, o rile, “Eyang ka toropongkgolo bjale, gomme le tla hwetša monna ka jeke ya meetse, gomme le mo latele. Gomme kae kapa kae a yago, botšang mong wa ntlo gore le nyaka go hira kamora.” Gomme kafao, O kgobokane le bona go ba le. . . go ja borotho, le go nwa beine, le—le go ba le kopanelo pele ga go tloga ga Gagwe.

11 Gomme re ikwela ka tsela yeo le baena ba rena. Ge re etla ka toropongkgolo, feela kgauswi le nako bjale go rena go tloga, re rata go ba le kopanelo yo motee le yo mongwe, go bolela le—le go hlagiša maikutlo a rena le ditebogo go rena seng, le go rapelelana seng, ka gore ka therašo, re ntweng, gomme re a hlokana seng go feta ka mo re kilego ra dira dinakong tšohle. Re hloka. . . Bakriste, re a hlokana seng bjale go feta go kile.

Bjale, rena re, boitshupo gore Modimo o araba thapelo le go re fa ditšhegofatšo tša Gagwe.

12 Gomme bjale, gosasa bošego, ge Morena a rata, ke tla rata go bolela ka molaetša wa phološo go kereke, go batho. Tlišang ka gare bao ba se nago Kriste le bakgelogi bale, gomme a re boleleng le bona ka—ka Modimo gosasa bošego, le ka fao re ka tlogo morago go Kriste.

13 Ba bantši ba swere dikarata tša thapelo, gomme re ya go rapelela motho yo mongwe le yo mongwe a babjago yo a nyakago go rapelelwa pele re tlogela toropokgolo, ge re swanetše go dula fa kgwedi go e dira. Le a bona? Re . . . seo ke se re lego fa bakeng sa sona, kafao re ya go rapelela yo mongwe le yo mongwe yoo a nyakago go rapelelwa. Gomme Modimo o tla fa tsela, gomme re tla—re tla e tšea. Re . . . feela bjalo ka . . . re no ya bjalo ka ge re ikwela go hlahlwa go ya, gomme kafao, seo ka mehla ke se sekaonekaone.

14 Re dirile melaetša ya rena lesea ka kgonthe, sebopego sa boswa, ga se nke ra ya ka go yona ka go teba, go batamela ga thutamodimo, gobane ye ke nako ya rena ya mathomo fa. Ga re nyake le foše Molaetša, re nyaka go o dira gore bana ba bannyane ba O kwešiše, terama ye nnyane, eupša efela, Ke Lengwalo ka go felela. Gomme ge . . . Ke therešo. Feela . . .

15 Eupša bjale, ge re ka bolela le banna ba baruti, re tla bolela le bona ka legoro la godingwana, ra o batamela ka tsela ye nngwe, goba—goba bakgethwa ba ba bonego bodiredi gomme ba bile tikologong ya bjona, gomme ba tseba ka mokgwa, re tla tsena ka go legoro la godingwana. Eupša fa re lekile go o boloka feela bonolo, gore go se be yo a tla o fošago. Gomme ke ikwetše Moya wo Mokgethwa o mpotša seo, go—go dira seo ge ke be ke sa le fa ka—ka go Santa Maria ye.

16 Gomme ke—ke . . . tshepa gore ka morago ga go tloga, gore go tla ba, go tšwa fa, gore go tla ba le tsošeletšo ye bjalo magareng ga dikereke! Ke—ke no rapela gore Modimo o tla le šegofatša kudu le go no le dira se—se—se seetša go lefase lohle, thwi fa ka Santa Maria, le batho bohle ba bakaone ba, le ba dikerekemaina tšohle, le a bona.

17 Bohle re batho, bohle re ja mohuta wa go swana wa dijo, bohle re rata basadibagatša ba rena le bana ba rena; re—re batho bao Kriste a ba hwetšego. Dinako tše dingwe bokerekeleina bo re kgaogantše gannyane nthatana, eupša re . . . ka nnete ka Bogoneng bja Modimo, re ka kgona go lebelela godimo ga wona maboto a mannyane fale, le go bona baena ba rena ka lehlakoreng le lengwe, le go otlollela tente ya rena kgojana gannyane, le go mo tšela ka gare le yena, le a bona, gobane yeo ke tsela ye re nyakago go e direla motho yo mongwe le yo mongwe.

18 Kriste o hwile go phološa motho yo mongwe le yo mongwe a lahlegilego, ga go kgathale se thutotumelo e ba diretšego. Seo ka mehla se lekile go ba go batamela ga ka go—go batho, ke go

ba mohlanka wa phatlalatša wa Kriste go “mang kapa mang a ratago,” le a bona. Feela go mang kapa mang e ka bago yena, ke mo go direla. Ga se a ke a thala mothalo go yo mongwe go nna go mo rapelela. Yena ga se a ke a re, “Bjale, *ba* ke Mamethodist, o se ke wa ba rapelela; *ba* ke Makatoliki, o se ke wa ba rapelela.” O nno re, “Rapelela bana ba go babja.” Kafao seo—seo ke sohle. Kafao ba—ba. . . Gomme ke no nyaka go. . . Yeo ke tsela ye ke e dirago.

¹⁹ Ke ka lebaka leo ga ke tšee lehlakore le e ka ba mang. Ke no dumela Lentšu le go no dula thwi le Lentšu. Gomme monagani yo mongwe le yo mongwe wa selekane o tla tseba gore Lentšu leo le a rereša. Le swanetše go no ba nnete, le a bona. Gomme ga ke bee tlhathollo ye e itšego go Lona, ke a leka, go no Le bala ka tsela ye Le balegago, morago ka bolela selo sa go swana; bjoo ke boipolelo.

²⁰ *Go ipolela* go ra “selo sa go swana,” boka, “Yena ke Mopriska yo Mogolo wa rena,” gabotse, King James e e bea “go bolela.” Eupša *go bolela* le *go ipolela* ke selo sa go swana, le a bona. Kafao gona *go ipolela*, seo se ra “go bolela selo sa go swana A se dirilego.” Ka megogoma ya Gagwe ke fodile; ke a ipolela. Le a bona? Ke ipolela selo sa go swana seo A se boletšego. Le a bona? Ke dira boipolelo.

²¹ Seo ke se se lego ka kgorongtshoko, o swanetše go bolela selo sa go swana. Bjale ke nna, go Mopriska Mogolo wa ka yo mogolo, ka gore O dutše ka seatleng se setona sa Bogoši go dira dipoelano godimo ga boipolelo bja ka. Kafao le a bona, pele Modimo a ka go direla e ka ba eng, sa pele o swanetše go e dumela le go ipolela yona, A ka se kgone go šoma, a ka se kgone go dira selo se tee.

²² Ke a le botša, ga go makatše batho ba boifa phodišo Kgethwa. Ke bolela se ka tlhomphokgolo le boena, eupša go bile le bofora bjo bontši kudu bo bitšwago phodišo Kgethwa, le a bona, bjoo bo tšhošetšego batho. E nong go elelwa, di kae ditšhošetši? Ka tlase ga mohlare wo mokaonekaone wa moapola. Yeo ke nnete. Ka mehla ke thekethe ya dijo. Ge o nyaka go hwetša moo diapola tše kaonekaone di lego ka serapeng sa dikenywa, e no hwetša me diklapo tšohle, le diphata, le ditšhošetši, le se sengwe le se sengwe se lego tikologong, ba leka go di tloša go mohlare wola. Gomme seo ke tlwa se diabololo a se dirago.

²³ Ke elelwa nako ye nngwe, mengwaga ya go feta, ke bile le thuto ka seo. Ke ba bakae ba tsebago lebidikoti ke eng? Ke karolo efe ya Kentucky lena bohle le tšwago go yona? Ke be ke. . . Go be go le molete wa kgale wa go nwelela, gomme ke be ke bjetše tše dingwe. . . Bjale, ka kgonthe ke. . . Leina la gagwe ke lebidikoti, eupša re mmitša lebidikoti. Ke—ke Moamerika ka kgonthe, gobane o gohlegohle setšhabeng. Gomme ke phoofolo ye nnyane ye kaone, sejaditla se sennyane. Gomme ke moisa yo monnyane wa swele le gona.

24 Kafao letšatši le lengwe ke be ke bjala dinawa potoro tsoko, gomme kafao, ke bile le dinawa potoro tše di bjetšwe, ga se ke kgone go di bjala, lebidikoti lela le lennyane la kgale le be le tla tla thwi go theoga mothalo, la di ja tšohle, le go ya morago ka moleteng wa lona, le go dula morago kua, ke a thanka, le go tomola meno a lona, le go ntebelela. Kafao ke naganne, “Ke no ya go tšhošetša mothaka yola.”

25 Go botega kudu, ke nna . . . mosadimogatša wa ka, a dutšego fa, a ka kgona go le botša ke nna motaki ka kgonthe, le a tseba. Kafao ke thadile seswantšho sa sefahlego se segolo sa go lebega go šiiša. Gomme e ka ba eng yeo ke tla e thalago ka tsela e ka ba efe e be e tla šiiša kudu. Kafao ke—ke tha- . . . (Ke a go leboga, Ngwanešu.) Ke thadile seswantšho sa sefahlego se segolo se le go ipeela dinawa potoro tsoko tlase ka mokotleng, le go se tlema, ka kokotela kota fase mobung, ka se bea godimo kua, gomme—gomme kafao, ke se beile thwi ka mothalong moo dinawa potoro tša ka di bjetšwego.

26 Go tšwa moleteng go tlile lebidikoti le lennyane la kgale. Gomme ke ile morago kua le go lebelela ka diferekeikere tša ka go mo šetša. O tšwetše ntle fale gomme o lebeletše gohle go dikologa, go bona ge eba ke be ke le e ka ba kae, gomme ga se a mpona, kafao o thomile go theoga go ja dinawa potoro, o fihlile thwi godimo kgahlanong le mokotla wola. E be e le letšatši la go homola, phefo e be e sa foke.

27 Kafao o eme, moisa yo monnyane, gomme a phagamela godimo, gomme a lebelela mokotla wola. A phagamela godimo ka maoto a gagwe a mannyane a morago gomme a retologela ka mathoko le go se lebelela, ka tsela *ye*. Gomme o—o tsebile go be go le se sengwe, sefahlego sela se segolo sa go lebega go šiiša godimo ga ona. Gomme o sepeletše godimo kgauswi ka kgonthe, le a tseba, gomme o se tabogetše makga a mane goba a mahlano go bona ge eba se be se tla taboga, ga se nke sa šutha.

28 Kafao o se bethile ka borofa bja gagwe bjo bonnyane, gomme se roromeditše tšona dinawa potoro, o tabogetše morago dikgato tše nne goba tše tlhano, gomme a se lebelela gape, a lekanyetša gape gomme a se batola gape, gomme sefahlego sela sa go lebega go šiiša, sa roromela gape. Ka gona a thoma go se šikinya ka borofa bja gagwe. E be se no ba go roromela, kafao o ile thwi pele go dikologa ka morago ga fao gomme a ya go ja dinawa potoro; se be se sa mo tshwenye le gatee. Le a bona?

29 Ge o bona se sengwe seo e lego bofora, o se ke wa se ela šedi, eya thwi go dikologa ka morago ga sona gomme o tšwelepele o eja. Yeo ke phetho. Le a bona? Le a bona? O se dumelele selo go go tšhošetša. Modimo ke Mofodiši, ka mehla O bile, ka mehla O tla ba.

30 Gomme bjale, le se ke la lebelela mehlolo. O se botše Modimo ka tsela ye o e nyakago, o no e amogela ka tsela ye A go fago

yona. O no swara tshepišo ya Gagwe le go e swara. Bjale, woo e bile morero wa ka, seo e bile se ke bego ke leka go se bea pele ga kereke ye—ye mo ka Santa Maria, ke go Mo amogela feela ka go dumela Lentšu la Gagwe tiragalong. Le a bona? Bogona le ponagalo ya Kriste, gomme ka gona, o se amogele phodišo e nnoši, eupša tshepišo ye nngwe le ye nngwe A e fago, bakeng sa Moya wo Mokgethwa, bakeng sa e ka ba eng. E amogele godimo ga motheo gore Bogona bja Gagwe bo fa go hlatsela tshepišo ya Gagwe.

³¹ Bjale, le a tseba, yeo ka kgonthe ke tsela ya Bantle ya go amogela Kriste. Le a tseba, go be go le Mojuda, nako ye nngwe ka Beibeleng, o rile, “Morwedi wa ka o babja ka mekgwa ye mentši, o loketše go hwa. Etna, bea diatla tša Gago godimo ga gagwe gomme o tla fola.” Le a bona? Bjale, Jairo yo monnyane, kafao ka mehla ke bile le kwelobohloko go yena, o be a le mohuta wa modumedi wa sephiri. Gomme ge. . . Ba bangwe—ba bangwe batho, le a tseba, ba ba sa dumelego go phodišo Kgethwa, eupša a nke yo mongwe a tle kgauswi le lehu, gomme ngaka a ba gane, gona ba dumela thwi ka pela ka go phodišo Kgethwa, le a bona. Efela o no be o se wa babja go lekane, yeo ke phetho.

³² Eupša ge e. . . o fihlile lefelong moo ngwana wa gagwe a nnoši a bego a robetše a ehwa, nako yeo o ile go hwetša Jesu. Bjale, mo šetšeng, o be a le Mojuda: “Etna, bea diatla tša Gago godimo ga morwedi wa ka, gomme o tla fola.” Bjale, yoo e be e le Mojuda.

³³ Šetšang Montle, Moroma: “Ga ke na maswanedi gore O tle ka tlase ga tlhaka ya ka.” Le a bona? “E no bolela Lentšu, gomme mohlanka wa ka o tla phela.” Yeo ke phapano, le a bona.

Bjale, re swanetše go dumela Modimo, gomme Jesu o retologile, le elelwa setatamente sa Gagwe se segolo? “Nna ga se ka bona tumelo ye bjalo ka go Israele.” Le a bona?

“E no bolela Lentšu, mohlanka wa ka o tla phela.”

³⁴ Ke be ke bolela bošego bja go feta ka mosadi, kgošigadi ye nnyane ya Seba, bjalo ka ge re mo tseba lehono, Jesu o mmiditše kgošigadi ya Borwa, gomme o phetše ka dikarolong tša kgolekgole tša lefase la go tsebja la letšatši leo. Gomme ke bile mohuta wa go kgala moloko wo bakeng sa go se O amogele, le ka fao O ilego go kgabaganya naga, le—le go ya pele, gomme go le bjalo ga ba O amogele. Gomme ke boletše ka fao gore batho ba ka se sepele go kgabaganya mokgotha bjale.

³⁵ Lehono ke be ke hlodišiša go dikologa, gomme ke hwetša go ne batho fa go tšwa kgole. Seo se laetša gore ba bangwe ba bona ba tšwa ditsela tše telele. Ke lebeletše bjale go banyalani, Mna. le Mdi. Tom Simpson, ba tšwa Saskatchewan, Canada, go ba ka kopanong. Ngwanešu Tom, a o ka no emelela? *Fa*. Go tšwa Saskatchewan, Canada, yena le lapa la gagwe.

36 Feela ka morago ga gagwe ke Ngwanešu Fred Sothmann, mosadimogatša wa gagwe le lapa. Le bona, gonabjale ba ka Jeffersonville, batho ba, eupša o tšwa Rosetown, Saskatchewan. A o ka emelela, Ngwanešu Sothmann, feela . . . ? Yena, go tšwa Rosetown, gomme yoo o tšwa kgolekgole.

37 Kgaetšedi Ungren, Kgaetšedi Downing, morwedi wa gagwe, gomme o na le barwedi ba babedi mo, le setlogolomorwedi, tsela yohle go tšwa Memphis, Tennessee. Ga se ka bona . . . Ke bone morwedi lehono mo mokgotheng. A o ka emelela, e ka ba kae o lego, Kgaetšedi Downing, goba Kgaetšedi Ungren, go tšwa Memphis, Tennessee? O go kae, bošegong bjo? *Fale*. Ke thakgetše kudu go ba le lena bohle ka kopanong.

38 Gape go na le bagwera ba ka ka kopanong, Ngwanešu le Kgaetšedi Welch Evans gohleohle go tšwa Tifton, Georgia, e ka ba dimaele tše dikete tše tharo go kgabaganya naga, le lapa la bona. A o ka emelela, Ngwanešu Evans, le Kgaetšedi Evans, a lapa la gago le fa? Ka gona re thabile go ba le bona ka gare le rena, tsela ka moka go tšwa Tifton, Georgia.

39 Ngwanešu Willie, ke lebetše leina la gagwe, ke a dumela o gohleohle go tšwa Tifton le yena. Ke mmone letšatši le lengwe fa. O mo go tšwa Tifton, Georgia, gomme ke thabile kudu go ba le bona mo.

40 Ngwanešu le Kgaetšedi Wood go tšwa Jeffersonville, Indiana, ba mo le bona. Ngwanešu Wood o kae goba Kgaetšedi Wood, bošegong bjo? Ngwanešu Wood le Kgaetšedi Wood go tšwa Jeffersonville. Bao e be e le batho bao Morena a dirilego selo se segolo bjalo, ba be ba na le mošemane wa segole ka bogole bja segotlane, ka leoto le le gogetšwego godimo. Ngwanešu Wood o be a le Hlatse ya Jehofa, gomme kafao, tatagwe o be a le mmadi ka go mosepelo wa Hlatse ya Jehofa.

41 Gomme o kwele ka yona, gomme ba tlile tlase Louisville, Kentucky. Gomme mosetsana o be a le ka kopanong bošegong bjoo, o be a fetoga go ba letlapa gohleohle godimo go fihla letheheng la gagwe, ngaka o rile, “Gohle go fedile ka diatla tša gago le se sengwe le se sengwe.” Gomme bošegong bjo bo latelago o be a kitima godimo le fase ga ditepisi, ka mokgwa *wola*, go letago la Modimo. Ba naganne seo se swanetše go šoma go morwa wa bona wa *pholio*, gomme ba . . . ke ile mošwamawatle ka pela . . . Gabotse, ba ile tlase Houston, Texas, moo seswantšho se tšerwego sa Morongwa wa Morena, ka go nepagala, gomme se lekotšwe ke George J. Lacy.

42 Ge monna wa Mokatoliki a eme fale a ahlaahla, gomme modiredi wa Baptist a re go be go se selo se sebjalo bjalo ka phodišo Kgethwa, le go ya pele, a leka go thoma ngangišano, goba go leka go dira le Mna. Bosworth.

43 Gomme ke rile, “Ga ke tleleime go ba modimo, ga ke tleleime go ba mofodiši, ke—ke tleleima go ba mohlanka wa Kriste. Ge

ke. . . Ke no re ge bodiredi bjo bo botšišwa, a nke Modimo a ipakile Yenamong.”

44 Gomme še E a tla e dikologa go theoga go kgabola kopano pele ga dikete atiša ka dikete tša batho, gomme *baswaswalatši* ba tšere seswantšho sa Yona. Se rometšwe Washington, DC, bošego bja go swana, nekethife, gomme—gomme ya fiwa tokelo ya khophi le go romelwa morago. Re na le yona le rena, bošegong bjo, e filwe tokelo ya khophi ke Douglas Studios ka Houston, Texas.

45 Mna. Ayers, Mokatoliki wa Roma, o bile le tlhaselo ya pelo bošegong bjoo gobane o swaswaladitše, gomme o rile gore (Mosadi o be a na le lehwa mogolong wa gagwe.), o boletše gore ke fefeantše lehwa go tloga mogolong wa gagwe, le tše bjalo ka tšeo.

46 Gomme—gomme Mna. Kipperman, Mojuda wa orthodox, le yena o boletše dilo tše dingwe tše mpe, gomme a ba Mokriste wa go kgwahla ka lebaka la mohlolo. Gomme e ile go dikologa lefase bjale.

47 Mna. Wood o be a le fao. Ka pela ka morago ga fao ke ile mošwamawatle, ka bowa morago. O tlišitše morwa wa gagwe wa segole go, godimo ka Ohio, Cleveland, Ohio. Gomme bošego bjo bongwe ka kopanong, o rile, “Moya wo Mokgethwa o mpontšha mošemane yo monnyane, lefelong le le *itšego*, yo a nago le leoto la go golofala, gomme O RIALO MORENA, o fodile.” Gomme lesogana ka pela la dirwa go thakgafala, gomme bjale o na le rena bošegong bjo, o nyetše gomme o na le bana ba babedi. David, a o kgauswi? David Wood, a o ka go . . . ? Šo yena, thwi fa le . . . Aowa. O ka se kgone ebile go bolela ke leoto lefe le gobaditšwego.

48 Ka gona, tatagwe, e le ra—ra rakonteraka wa go tsebalega go kgabola naga, o rekišitše se sengwe le se sengwe a bego a na le sona, o hirišitše dintlo tše a di agilego, gomme a hudugela kgauswi le nna, gomme o dutše fao ge e sa le. Ge e sa le go tloga nako yeo, mosadimogatša wa gagwe, a le Momethodist, goba Church of God e bile, gomme batho bohle ba gabo Mamethodist, yo mongwe le yo mongwe wa batho ba gabo, bokgole bjo ke tsebago, o amogetše Moya wo Mokgethwa gomme ba tladitšwe ka Moya wa Modimo ge e sa le go tloga nako yeo.

49 Ngwanabo Mna. Wood o tlile tlase moswaswalatši, gomme o be a . . . Moya wo Mokgethwa o utolotše ka pono go batho bale bohle, le go ba botša dilo boka tšeo, go ba kgodiša, bana babo, dikgaetšedi tša gagwe. Gomme tatagwe, mmadi, o tlile tlase go ntšhogašoga, gomme Moya wo Mokgethwa o boletše le go bolela se se bego se tla direga letšatši la go latela, Lentšu ka Lentšu sa tla go phethega. O ile a tlatšwa ka Moya wo Mokgethwa gomme a hwetša phenyo, Mna. Wood. Oo, e ka kgona go ya pele le pele! Ba bantši mo ba ke. . . Ke a holofela ga ke lahlegelwe ke yo motee, eupša go na le ba bantši mo ke na le nnete gore ke šetše ke bile

le yona ka monaganong wa ka, goba ke be ke eya go tsebiša bošegong bjo.

⁵⁰ Ke ya go dira se sengwe, ke ya go swara go kgakgamollwa go gogolo ge ke fihla gae. Kgošigadi ya ka, a o ka emelela, Hani? Oo, ke a tseba sefahlego sa gagwe ke se sehubedu, eupša. . . Ga a tsoge a rata go e dira. Mosadimogatša wa ka, Mdi. Branham. Le morwedi wa ka yo monnyane, Sarah. O go kae, Sarah? Emelela. Ke a nagana o ka kopanong. Morwa wa ka yo monnyane, Joseph, o kae? Emelela, Joseph. Yoo ke morwa wa ka, Joseph. Ke na le yo motee gape yo a sego mo bošegong bjo, Rebekah.

Le ee, Ngwanešu Jim Maguire, mošemane wa rena wa theipi, yo a nyetšego ka lapeng la Sothmann, ke mošemane wa theipi a emego *fa* ka lehlakoreng.

⁵¹ Ngwanešu Welch Evans, seo se tla monaganong wa ka, gore Ngwanešu Evans. . . Lekga la mathomo ke kopanego le Ngwanešu Evans. . . Ke a holofela ga ke tšee nako ye ntši kudu. Eupša Ngwanešu Welch Evans, a ke bile le yena a eme nakwana ya go feta (ke a dumela ke dirile.), yena le lapa la gagwe?

⁵² Re be re le ka Philadelphia ka—ka kopanong, gomme ba bangwe. . . mošemane wa theipi, yo mongwe wa bona, Mna. Mercier, yo a lego. . . Ngwanešu Mercier le Ngwanešu Goad ba—ba. . . ga ba sa na le rena gape, ba ile ka go mošomo wa sefefase, gomme ga ba sa na le masolo gape.

⁵³ Gomme Ngwanešu Mercier o be a rile, “Go ne monna go tšwa borwa, a bitšwago Evans, o nyaka go kopana le wena.” Gomme ke rile. . . “A o ka ja difihlolo le yena mo mosong?” Gomme o be a hlokomela dilo tšeo nako yeo, dipeelano le go ya pele, boka morwa wa ka a dira bjale, Billy Paul.

Gomme ke rile, “Ee, go tla loka.”

O rile, “O nyakile go kopana le wena.”

⁵⁴ Mosadimogatša o be a na le nna ka kopanong ye le Joseph yo monnyane, yeo e bile e ka ba mengwaga ye meraro ya go feta. Gomme lena bohle le tseba kanegelo, goba mohlomongwe le badile ka ga Joseph. Ke be ke tšea bophelo bja Joseph. Gomme ngaka o be a re boditše re be re ka se sa ba le bana ka morago ga ge Rebekah a belegwe, gobane o be a le ka karo, gomme mosadimogatša o be a ka se kgone go ba le ngwana yo mongwe.

⁵⁵ Gomme ke ile ka kamoreng ye nnyane ka Minneapolis, gomme ke be ke lla fale pele ga Morena, gomme pono ya tla fase gomme ya re, “O tla ba le morwa, gomme o tla bitša leina la gagwe ‘Joseph.’” Gomme kafao, ke thomile go e bega go batho bohle, gomme kafao, morago ke letile mengwaga ye mene.

Gomme yo mongwe le yo mongwe o rile, “Go reng ka seprofeto sela ka Joseph?”

Ke rile, “O tla ba mmogo, se tshwenyegeng.”

⁵⁶ Gomme ka gona re tsebile gore, mosadimogatša o be a eya go ba mme gape, gomme kafao ge le belegwe, e be e le mosetsana, Sarah. Gomme yo mongwe le yo mongwe o ile a ntshega, o rile, ke. . . “O be o e ra Josephine, a o be o sa re?”

Ke rile, “Aowa, ke be ke era Joseph.”

Ngaka o rile, “Mna. Branham,” o rile, “bokaone re dire karo ye nnyane fa, gobane mosadimogatša wa gago a ka se kgone, le ka mokgwa ofe, go emela ngwana yo mongwe.”

⁵⁷ Ke rile, “Ngaka, o se leke go mo kgwatha. Re ya go ba le morwa, gomme leina la gagwe ke Joseph.” O ile a no ngwaya hlogo ya gagwe, gomme a dira ka mokgwa *woo*, gomme a sepela.

Gomme mengwaga ye mene gape ya feta, gomme letšatši le lengwe re hweditše gore o be a eya go ba mme gape. Ba bangwe ba bona ba rile, “A yo ke Joseph?”

Ke rile, “Ga ke tsebe, eupša. . .” Ke rile, “Ga ke tsebe, eupša Joseph o etla, gobane Modimo ga se nke a mpotša selo gabjale eupša se e bego e le therešo.”

Gomme kafao, ke ile ntle, sepetlele gomme ka mo atla ge a eya godimo ka kamoreng, kamora ya go belega.

Metsotso e se mekae, mooki o tlile tlase, o rile, “Mor. Branham ke mang?”

Ke rile, “Nna.”

Gomme o rile, “O na le mošemane yo mokaone wa boima bja šupa.”

Ke rile, “Joseph, Hani, o bile nako ye telele go fihla fa. Papa o mohuta wa go tšaba go go bona!”

O rile, “O mmiditše ‘Joseph.’”

Ke rile, “Leo ke leina la gagwe.”

⁵⁸ Gomme kafao, re be re le, godimo ka Philadelphia, gomme mosong wola ke tsogile, gomme ke be ke lebeletše ka kamoreng, ke rile, “Hani, monna yo re swanetšego go kopana le yena mosong wo o robile molao.” Ke rile, “O be a thea dihlapa, gomme o swere mokotla wa go tlala dihlapa, tše ntši kudu. Gomme ke mmone a di uta makga a mabedi goba a mararo go tloga go mohlokamedi wa diphoofolo.” Gomme le tseba ka fao ke bego ke fela ke eba mohlokamedi wa diphoofolo tša lešoka lebaka la mengwaga ye mmalwa.

Gomme ke rile, “Ke mmone a uta tšona dihlapa go tloga go mohlokamedi wa diphoofolo tša lešoka.” Ke rile, “Nna, leo e be e le lefelo la go makatša a bego a thea dihlapa ka go lona, le dihlapa tše ntši kudu—kudu.”

⁵⁹ Gomme kafao feela nako yeo Joseph yo monnyane o phagametše godimo le go tla godimo go nna, a ka ba bogolo bja mengwaga ye mene, gomme o rile, “Papa, Da-Da,” se a bego a e ra David, “o ya go ba le kotsi ka sethuthuthu.”

Ke rile, “O ra eng?”

⁶⁰ O be a šetše a mpoditše pono, o rile, “Nna...ke otlela paesekela ya ka ye nnyane ya maotwanatharo ntle go bogela kgaetšedi wa ka yo monnyane, Sarah, a etla go rotoga mokgotha.” Gomme o rile... “Papa, a Modimo o ne seatla?”

Gomme ke rile, “Ee.”

⁶¹ O rile, “Ke bone seatla go no swana le sa gago,” ka mokgwa *wola*, ka dikonope, gomme o rile, “se be e swere thwi godimo ga ka, go nthibela go tloga mokgotheng ge ke be ke letile kgaetšedi wa ka.” Gabotse, ga se nke ra e hlokomela, le a tseba, go no phela ka tsela ye re dirago, le go mo kwa a bolela ka dipono, kafao ke naganne mohlomongwe moisa yo monnyane, le tseba ka fao... .

Kafao mosong woo o rile, “David o ya go ba le kotsi ka sethuthuthu, o ya go kgoboga leoto la gagwe ka lehlakoreng la go ja.”

Gomme ke rile, “Joseph, o sa tšo tsoga, Morwa, etla fa.” Ke rile, “A o lorile seo?”

O rile, “Aowa, Papa, ke sa tšo bona David a na le yona.

⁶² Matšatši a mane goba a mahlano go tloga fao, David... Mošemane o tlele go tšwa Louisville ka sethuthuthu, o nyakile David go se otlela, o se otleše go theoga mokgotha, se mo kgothotše, le go kgobola leoto la gagwe la go ja, feela tlwa.

⁶³ Re ile godimo go bona Mna. Evans le mosadimogatša wa gagwe wa go ratega. Gomme ke rile, “Ngwanešu Evans,” (Morago ga ge ke kopane le yena, ke boletše le yena.), ke rile, “o dula ka gare, tlase felotsoko go ne go thea dihlapo go gobotse kudu.” Gomme ke rile, “Ke nna motheadihlapo.”

Gomme o rile, “Ee, ke a dira.”

⁶⁴ Ke rile, “Dibeke di se kae tša go feta o be o thea dihlapo gomme o bile le mokotla o tletše hlapo, go se molaong.” Gomme ke rile, “O ile wa swanela go di uta e ka ba makga a mararo go tloga go mohlokomedi wa diphoofolo tša lešoka.”

⁶⁵ O lebeletše godimo go nna, o rile, “Yeo ke therešo.” Gomme o ntebeletše, mohuta wa go fufulelwa gannyane, gomme ke rile, “Go na le kgopelo e tee feela: A o tla ntšeela lefelong lela go ya go thea dihlapo?”

O rile, “Ke tla dira.”

⁶⁶ Re ile tlase go, thea dihlapo, gomme e be e le ka Florida, tlase ka go kou ye nnyane le go ya pele. Gomme re sepeletše morago ka dirorobjeng tša dikgaga morago fale, moo a bilego le ngwanešu yoo a bilego, feela dikgwedi di se kae pele ga fao, o ile a longwa ke noga ya seroromedi.

⁶⁷ Bjale, o nagana marabe wa gago o gampe, e no lebelela yo mongwe wa baisa ba bannyane bale, gampe go feta senyokanyoki. Gomme o...Gomme di robala thwi godimo ga

meetse le go go itia. Ka Florida, di no, dinoga di no, di no ba ka methalong.

⁶⁸ Gomme kafao, re bile—re bile le dithunya, le diphata, gomme re be re tla ya morago go kgabola tše, moo ba bego ba sepediša diphaephetshepedišo go kgabola polasa ya diakere tše dikete tše lesomešupa, le go bea dikgomo tša gagwe tša Brahman ka fale, gomme di bile mabelete. Gomme rena, morago ka fale hleng le dipaabora tšela tše kgolo bogolo. Nna, a dilo tše botse di bilego! Re be re na le dikota tša tšeletši, re be re di swara. Gomme kafao re be re šuthiša dilili ka mokgwa *wola*, le go lebelela tikologong bakeng sa dikgaga, le dinoga, le go ya pele, gomme morago ra sepelela godimo ka meetseng.

⁶⁹ Gomme re fihlile godimo moo mothalo wa diphaephetshepedišo, goba, mothalo wa go goga o be o lahletše tho—tho thogorogo ntle. Gomme ke be ke swere tše dingwe; paabora ye kaonekaone nkilego ka e bona! Gomme ke be ke na le ye kgolo ye tona godimo, molomo wa gagwe o be o ka ba bogolo *bjoo*, gomme nosi ye nnyane ye ya khunkhwane e be e sa dule ka molomong wa gagwe, o be a swanetše go e swara, gomme o be a kgona go e tshwela ntle, goba go e lahlela ntle, gomme khunkhwane ye e tloatlola godimo ga meetse, o be a tla e tlimarela gape. Ke bile le yena makga a mararo, ebile ga se ke kgone go mo swara.

Mna. Evans o be a na le maoto a borokgo bja gagwe a menetšwe godimo, gomme a tla godimo kua, a re, “Ngwanešu Branham, ke go bone o swara ye kgolo yela!”

⁷⁰ Ke rile, “Oo, nna, o a kgahliša!” Gomme, Ngwanešu Evans, nka se ba botše gore o lokolotše hlapi ya ka ka kotsi morago ga sekgalela seo. Kafao ke tla. . . Ke bile le sehlopha se segolo se tlemilwe, sa dipaabora tše botsebotse, gomme o thomile go di topa le go dumelela lenti go kitima go kgabola, gomme sehlopha ka moka sa tšona se tlogile. Kafao re bile le tša bothakga tše lesometee, ba bile le diswantšho di tšerwe bošego *bjoo*.

⁷¹ Kafao re be re. . . Ke bile le hlapi ye, gomme ke e lekile gape, gomme ye nngwe e e bethile, ke a nagana hlapi ye e be e imela lesomepedi, diponto tše lesomenne, kafao, paabora ya molomo wo mogolo bogolo. Gomme ye tee ye, o be a itia go kgabola meetse, gomme ke be ke leka go mo swara ka mokgwa *wola*, Ke rile, “Aowa, yoo ga se yena.” Kafao ke be ke mo lapišitše, a imela e ka ba diponto tše šupago goba tše seswai, gomme ke be ke mo tlišitše godimo go leba lešing, moo mahlaka le go ya pele a bego a eme godimo, gomme o rile, “Ema motsotso, Ngwanešu Branham, ke tla go hweletša yona.”

Ke rile, “Ga go tshwenye, nka mo tliša ka gare.”

⁷² Eupša o nno tabogela ka meetseng ka maoto a borokgo bja gagwe godimo ka mokgwa *wola*, gomme o be a se a fetša go taboga, go fihla a tabogetše morago. Noga ya seroromedi ya mo

kobola gomme. . . thwi ka lehlakoreng la lenao le leoto. Gabotse, ga se nke ka ke ka bona tlaišego ye bjalo lebaka la dinakwana di se kae. E no nyaka e golofatša le go dira marapo a gago go gatsela ka go wena.

⁷³ Gomme ke be ke le morago kua, gomme Mna. Evans o tla imela kgauswi le makgolopedi. Gomme go swanela go rwala monna yola go kgabola serorobja sela mokokotlong wa ka e be e le selo se nnoši seo se kago go dirwa, go mo iša ntle koloing, e ka ba dimaele tše pedi, ke a thanka, kgole. Gobaneng, yena, a no swara meno a gagwe mmogo! Gomme ke lebeletše, gomme ke bone e ka ba intšhi bophara moo, go se bontšhi bjoo, moo le, meno bobedi a bethile thwi mo maotong a gagwe.

⁷⁴ Gomme ngwanabo o be a sepela godimo ga ntikodiko ka tlase ga maoto a gagwe, moo e sego ka godimo ga dijarata tše makgolopedi go tloga fao, o be a kobotšwe ke noga ya seroromedi. Bjale, ngwanabo ga se Mokriste gomme o tla. . . o robetše ka sepetlele lebaka ga ke tsebe ke matšatši a makae goba dibeke. Gomme go le bjalo ka morago ga dikgwedi o bile le ntikodiko, a sepela godimo ga yona, nako ye telele.

⁷⁵ Gomme noga ye ya seroromedi e be e kobotše Ngwanešu Evans. Gomme feela ge ke. . . ke naganne, “O Modimo, re ka dira eng?” Gomme Lengwalo le le tlile ka monaganong wa ka: “Ba tla gata godimo ga dihlogo tša mašikišiki le disephente, gomme ga go selo se tla ba gobatšago.” Gomme ke beile seatla sa ka godimo ga yona, ka re, “Tate wa Legodimong, re ka seemong sa tšhoganetšo. Gomme Wena o Thušo ye e lego gona ka nako ya bothata.” Le a bona? “Gomme O boletše gore ga go selo se tla gobatšago badumedi ba, gomme ngwanešu yo ke modumedi. Gomme ke bitša bakeng sa kgaogelo ya Gago.”

⁷⁶ Gabotse, o emišitše tlaišego ya gagwe, goba, go ya pele, ke naganne e be e le ka tlhompho go thapelo ya ka. Gomme ge ke feditše, o rile, “Ga go bohloko felo,” a emelela, a ya pele go thea dihlapu. Re theile dihlapu letšatši ka moka.

⁷⁷ Gomme bošegong bjoo, e ka ba ka iri ya lesometee re be re bontšha hlapi tše, gomme ngwanabo o tlile godimo, gomme o be a mmošša ka yona. Gomme ngwanabo modiradibe o rile, “Welch, go lokile go ba wa bodumedi, eupša ga se gwa loka go gafa.” O rile, “Eya sepetlele ka pela ka mo o ka kgonago, gomme o hwetše kalafo tsoko ya dihlare, goba o tla swana le nna.”

⁷⁸ Mna. Evans o rile go yena, o rile, “Lebelela, Ngwanešu, seo se diregile mosong wo e ka ba ka iri ya lesome, gomme Modimo o mpolokile ntle le bohloko, gomme e ka ba ka iri ya lesome bošegong bjo. Ge Modimo a ka kgona go mpoloka bokgole bjoo, A ka kgona go mpoloka tsela ka moka.” Kafao. . . A yeo ke therešo, Mna. Evans? Uhm, ke yona. “Gomme ga se ba kgone go bolela selo kgahlanong le yona, monna o be a eme magareng ga batho.” Oo, O sa le Modimo, mogwera. Le a bona?

⁷⁹ Monna yola o a sepela, yena le lapa la gagwe, nako le nako ge ke le tabarenekeleng, gomme nako ye nngwe yeo ke beke ka morago ga beke, dimaele tše makgolo a lesometlhano Lamorena le lengwe le le lengwe. O tla godimo ka . . . o thoma ka Labohlano gomme o fihle kua Mokibelo, gomme o boela morago Mošupologo goba Labobedi. Gomme o na le mošomo wa sefatanaga, gomme ba sepela bokgole bjoo go kwa Ebangedi.

⁸⁰ Oo, dilo tše dintši kudu di ka boletwago! Gomme še nako, nna ke thoma go rapelela balwetši, eupša ke no tšea nako ye, ke a holofela ga se ka tsenatsena selo, gomme go no lemoga ba bangwe ba batho ba ba tlilego bokgole bjo go—go kwa. Bjale, ke duma ge bohle re ka dira, ka morago ga se, feela nako e tee gape, go inamiša dihlogo tša rena.

⁸¹ Tate wa rena wa Legodimong, dihlatse tša Ebangedi di kgauswi. Wena ka mehla o kgauswi go thuša le go šegofatša bao ba hlokago. Gomme ke rapela Wena, Tate, gore O tla šegofatša le go thuša bohle bao ba hlokago. Gomme mabopaki a a fiwa ka seetša sa Ebangedi, gore batho ba ba babjago le go hloka ba ke ba amogele thušo le ditšhegofatšo go tšwa go Ebangedi.

⁸² Thuša mohumagadi yo moswa yo bjale, yo a tlaišegago, morago fa ka kopanong, ka nako ye. Re a rapela gore dikgaogelo tša Gago le mogau di tla ba godimo ga mohumagadi. E fe, Tate. Gomme a nke maatla a Gago e be a gagwe, gomme mo arolele ditšhegofatšo tša Gago.

⁸³ Gomme re a rapela, Tate wa Legodimong, gore O tla re šegofatša bjale ge re batamela Lentšu la Modimo yo a phelago, gore kgaogelo ye kgolo le ditšhegofatšo tša Modimo di tla ba godimo ga rena bohle. Ba ba bea bohlatse gore O Modimo, le gore ga O hlomphe motho, gore O na le bao ba kganyogago, go—go thuša, le go kganyoga go fodišwa. Kafao efa ditšhegofatšo tše go rena. Gomme ge re bala Lentšu la Gago re a rapela gore O tla tlotša Lentšu la Gago bakeng sa go holega ga bao ba theeditšego ka gare. Leineng la Jesu, re a e kgopela. Amene.

⁸⁴ Bjale, ka Beibeleng, ka go Mateo tema ya 14 go thoma ka temana ya 22, ke rata go bala. Gomme sehlogo sa ka bošegong bjo ke, “Bopaki.”

Gomme ka pelapela Jesu o gapeletša barutiwa ba gagwe go tsena ka sekepeng, le go ya pele ga gagwe ka lehlakoreng le lengwe, ge a be a romela mašaba kgole.

Gomme ge a rometše mašaba kgole, o ile godimo ka thabeng a nnoši go rapela: gomme ge . . . mantšiboa a tlile, o be a le fale a nnoši.

Eupša sekepe bjale se be se le bogareng bja lewatle, se tšokatšokišwa ke maphotho: ka gore diphefo di be di le kgahlanong.

Gomme ka go tlišo ya bone ya bošego Jesu o ile go bona, a sepela godimo ga lewatle.

. . . ge barutiwa ba mmone a sepela godimo ga lewatle, ba ile ba tshwenyega, ba re, Ke moya; gomme ba goleditše ka poifo.

Eupša ka pelapela Jesu o boletše le bona, a re, Ebang le tlhohleletšo ye botse; ke Nna; se boifeng.

Gomme a nke Morena a oketše ditšhegofatšo tša Gagwe go yona.

⁸⁵ A mohumagadi o a babja? Go babja ka kgonthe. Go lokile. O reng? Bjale, yo mongwe le yo mongwe, se le se rutilwego, dulang go iketla, inamišang dihlogo tša lena gomme le rapele. [Ngwanešu Branham o rapelela mohumagadi, mantšu ga a kwagale. Ga go selo go theipi—Mor.]

⁸⁶ Bjale, le se boife. E nong go ba tlhompokgolo ka kgonthe bjale. Mohumagadi o idibetše, gomme o a babja, gomme ba ya go mo iša moyeng. Re mo rapeletše. Gomme re . . . ba ya go mo iša moyeng bjale, gore a kgone go hwetša moya tsoko. Gomme bjale, a re tšwelengpele ka . . . Tumelo ga e tsebe poifo. Kafao nno bang tlhompokgolo ka kgonthe. Go lokile. O tla ba gabotse, ge o ka no se belaele bjale. Dumela.

⁸⁷ Bjale, ge re bolela ka thuto ye: *Se Boifeng, Ke Nna*. Bjale, e swanetše go ba e bile e ka ba ka nako ye letsatši le diketšego mantšiboa ge yo mogolo, wa go tia, motheadihlapi wa magetla a go tia o thoma go šuthiša sekepe go tloga lešabašabeng. Gomme ge ba thoma go šuthiša sekepe go tloga mašabašabeng, ba retolla nko go dikologa gape le go namela godimo, a dutše fase lehlakoreng la ngwanabo, Andrea, ka gore ba be ba le banešu le batheadihlapi, gomme a topa lehuduo la gagwe . . .

⁸⁸ Bjale, dikepe tša lehono ga di swane le dikepe tša maabane, dikepe, tše ba di bitšago dikepe, di be di fapana le dikepe tša rena lehono. Re na le petrole, le oli, tisele, le go sepedišwa ke tšete, le . . . eupša wona matšatši ba ile feela ka maatla a seatla, goba ka diseila ka phefo ke tsela ye ba ilego go *bofihlo* bja bona ka dikepe tša bona. Makga a mantši go be go le madimo a magolo lewatleng, gomme ba be ba sa kgone go no tšea monna yo motee ka sekepeng, go tšere matsogo a go tia go swara dikepe tsela.

⁸⁹ Lena batho fa le tseba se e se rago, o ka se kgone go tšea sekepe thwi godimo bokagodimo ga ntlhora ya lephoto ka mोगwa woo, o tla nwelela ka bowena. O swanetše go gega lephoto lela, o tsebe mोगwa wa go le betha ka sekepe sa gago go se dira se ye go kgabola ledimo. Gomme monna wa sekepe yo mokaone o kwešiša ka fao a dirago seo, gomme banna ba ba swanetše go ba banna ba sekepe ba bakaone goba ba be ba ka se phele.

⁹⁰ Gomme ka fao ba be ba na le setulo, gomme ba be ba tšea monna yo motee ka diatla tše pedi godimo ga lehuduo le legolo ka lehlakoreng *le*, thwi go kgabaganya go tloga go yena go tla ba monna yo mongwe ka mohuta wa go swana wa lehuduo. Gomme dinako tše dingwe mahuto a tshela goba a seswai a mahuduo a tla ba ka fale, ao a tla gogago sekepe se ka maatla; ka fao ba tla dirago, nako ya go swana, morethetho wa go swana! Gomme e be e le kgorometšo ye maatla yeo sekepe sela se bilego le yona, ka mahuduo ale a magolo a mphaphathi ao ba bego ba a šomiša matšatšing ale.

⁹¹ Gomme ge yo mongwe le yo mongwe a tšere maemo a bona, ba karabeditše mahuduo a bona tlase ka meetseng, gomme ba thoma go goga makga a mabedi goba a mararo, ka gona ba šišinyetša batho godimo ga leši, “Šalang gabotse.”

Gomme ba be ba re, bjalo ka mehla ge re na le kopano ye kgolo, “Etlang morago gomme le re bone.”

⁹² Go na le se *senqwe gape* ka batho le Bakriste, ge ba kgobokane mmogo ka mmero o tee le ka kopanelong, ba na le dilo tša go swana. O ka bolela gore—gore, ka fao ba . . . go bothata go bona go arogana yo motee go tloga go yo mongwe.

⁹³ Gomme bjale, ye e ka no ba gannyane ka mothalong wa ka thoko, eupša bontši bja lena batho le bone batho bao le no ratago go ba ka bogoneng bja bona, gomme ka gona o bone batho bao—bao o . . . ba be ba le batho ba bakaone eupša o be o sa kgone go ema go ba ka bogoneng bja bona. Le a bona? O mohlodi wa seemo go go dikologa. Gomme o dira seo ka bowena ka semelo sa gago mong le moya wo o lego ka gare ga gago.

⁹⁴ Gomme go no swana le mme wa ka wa wa kgale wa borwa o be a fela a mpotša, yo a sa tšwago go ya Legodimong dikgwedi di se kae tša go feta, o be a fela a re, “Billy, dinonyana tša lefofa di turupa mmogo.” Yeo ke therešo. Kafao kagona, magokubu, ditopeledi, le maeba ga di kgone go ba le kopanelo seng sa tšona, dijo tša tšona di a fapana. Le a bona? Di ka se kgone go ja selo sa go swana.

⁹⁵ Gomme—gomme yeo ke tsela ye go lego magareng ga maemo a Bokriste. Re kgobokana ka mokgwa wo, go kgobokana mmogo, gobane re ne dilo tša go swana. Re no rata go tla kopanong. O rata go bona modiša wa gago a sepelela godimo ga materapo, gomme o a rata, gobane o a tseba o ya go rapela le go hlompha legae la gago, bogona bja gagwe bo ra bontši kudu go wena. O nyaka go tliša bana ka gare, go kgobokana go dikologa, gore ditšhegofatšo tša modiša di kgone go ba godimo ga bana. Gomme ge le etelana seng sa lena le nyaka go bala Beibele, le go neela thapelo mmogo, gobane le ne dilo tša go swana.

⁹⁶ Oo, Kereke e swanetše go ba Selo sa letago kudukudu, kopanelo yela! Ka fao gore . . . Re be re tlwaetše go opela ka tabarenekeleng, mengwaga ya go feta, ge ke be ke diša

Missionary Baptist Tabernacle, ka Jeffersonville, re be re tlwaetše go opela pina ya kgale:

Tšhegofatšo e be tlemo ye e tlemago
Dipelo tša rena ka lerato la Bokriste;
Kopanelo ya menagano ya leloko
E swana le yela ya Godimo.

Gomme ge re arogana go šwalalana,
E re fa bohloko bja ka gare;
Eupša re tla no fele re kopane ka pelong,
Le go holofela go kopana gape.

Oo, seo se be se era . . . go tšwa dipelong tša rena. Re ratana seng.

⁹⁷ Gomme ba be ba amana le Bakriste, banna ba monagano wa go swana letšatši lela, gomme ba—ba bile le kopanelo. Gomme ge ba be ba tlogelana, ba eya go kgabaganya lewatle, ba be ba šišinya, “Etlang morago, re boneng gape. Etlang, re botšeng ka Ebangedi ye ya go ratega ya Bophelo bjo Bosafelego, tlišang Mong wa lena mmogo le lena,” ba šišinya, nako yeo yo mongwe o be a tla goeletša go yo mongwe, a re, “Le boweng,” mohlomongwe wa leloko.

⁹⁸ Gomme ba be ba tla goga merethetho e se mekae gape, le go šišinya, gomme phathi ye nnyane mo lešing ya ba ye nnyanenyane, ye nnyanenyane, gomme morago ga lebakana e fifetše gohlegohle. Letšatši le swanetše go be le be le diketše nako yeo, gomme ba be ba eya go swara mohemo le a tseba, ka baka la go tšwa mphufutšo go tšwa go go goga mola go boima. Ba ile ba swanela go tshela lewatle bošegong bjoo, Lewatle le lennyane la Galelia, gomme ba be ba lapile go tšwa go katano ya letšatši, ba swanetše go be ba eme.

⁹⁹ E swanetše go be e bile Johane yo moswa, o be a le yo monnyanennyane, go molaleng o be a lapile ka pela go feta banna ba sekepe ba kgale ba go tia. Kafao o swanetše go be a rile, “Baena, a re emeng feela motsotso le go swara mohemo.” Gomme ke kgona go mmona ge a phumula mphufutšo go tloga hlogong ya gagwe ya lefatla. “Fše!” O rile, “Le a tseba, ge re sa khutšitše dinakwana di se kae,” ge sekepe se sennyane se phaphametše mmogo, Johane o swanetše go be a phagamišeditše hlogo ya gagwe godimo le go re, “baena, ke tla rata go ba le bopaki bjo bonnyane mo.”

¹⁰⁰ Le a tseba, ka mehla go na le se sengwe ka pelong ya motho seo ba ratago go se bolela, ge ba le, boitshepo ka go se ba se bolelago. Go na le se sengwe ka yona, o swanetše go paka le go bolela se sengwe.

¹⁰¹ Johane a ka no ba a boletše se sengwe boka se: “Re ka khutša netefaletšong gore Monna yo re mo latelago ga se se le—le lefase le Mmitšago, moprofeta wa maaka. Yena ga se Beletsebubu, bjalo

ka ge baprista ba rena ba re Yena ke, mmolelelamahlatse, Yena ga se selo bonnyane go feta Jehofa.”

102 “Ge ke be ke sa le mošemane yo monnyane re be re dula tlase. . .” bjale, re phuleletša ka gare go kopano ya bopaki, “re be re dula tlase kgauswi le Jorodane. Gomme ke kgona go elelwa ka kgwedi ya Aporele, ge matšoba a mannyane a etla godimo ka seruthwane, ke be ke fela ke topa matšoba a mannyane a le go kitimela ka gare ka lehupa, le go a fa wa ka yo mobotse, mme yo monnyane wa Mojuda. Gomme o be a nkobakobetša go robala ka morago ga sekgalela bakeng sa kgoswane ya ka, ntle mathuding, le go mpotša dikanegelo tša Beibele, gomme ke elelwa tše ntši kudu.

103 “O be a tla mpotša ka Joshua, ge a tlišitše bana ba Israele feela gannyane ka tlase ga lefula fale, go tšwa lešokeng, le go kgabaganya. . . thwi ka kgwedding ya Aporele ge Jorodane e be e phophoma, gomme godimodimo ka meetseng a hlogo Modimo o swere meetse, gomme ba sepetše thwi go kgabaganya godimo ga naga ya go oma.

104 “Gomme, dikanegelo tšohle, gomme e tee e be e fela e nkgahla kudu e bile yela a bego a fela a mpotša ka batho ba rena ba etla godimo go tšwa Egepete, ka go tla nagalegaeng ya rena yeo Modimo a re filego. Gomme ka fao Modimo a ba hlokometšego ge ba be ba tlogela Egepete le go thoma go ya pele nageng ya tshepišo, ka fao Modimo a tshepišitšego go fa se sengwe le se sengwe ba bego ba se hloka. Gomme ka fao gore bošego bjo bongwe le bjo bongwe, Modimo o be a romela fase mana, borotho, go tšwa legodimong gomme bo be bo robetše gohle godimo ga mobu, gomme mosong wa go latela, selo se nnoši batho ba rena ba ilego ba swanela go se dira e bile go ya ntle le go topa borotho bjo, le go bo ja, le go phela go kgabola letšatši.

105 “Gomme go be go fela go mmakatša bjalo ka mošemane yo monnyane,” a ka no ba a rile, “ke be ke tla retologa godimo le go re go Mme, ‘Mme, Modimo o hweditše bjang borotho bjola? A O na le. . . Magodimo ohle a tletše ka dionto tše kgolo, gomme O na le sehlopha sa bošego godimo fale se šoma, gomme O paka borotho bjo le go romela Barongwa fase le go bo bea gohle godimo ga mobu bakeng sa bana ba Gagwe?’

106 “O rile, ‘Aowa, Johane, mošemane wa ka yo monnyane, ga o kwešiše, o yo moswa kudu go le bjalo. Modimo ga se a swanela go ba le dionto, Modimo ke Mohlodi, O no hlola borotho thwi go tšwa moyeng, gomme bo wela godimo ga lefase, ke ka fao A fepago batho ba Gagwe.’

107 “Gomme baena, lehono ge ke Mmone a tšea dipisikiti tše tlhano tšela le dihlapa tše pedi, le go fepa batho ba dikete tše tlhano, ke tsebile O be a swanetše go ba le kgokagano tsoko le Jehofa yola, gobane O hlotše borotho. Ke tsebile go be go swanetše go ba Mohlodi wa go swana Yo a hlotšego borotho

bjohle bjola ka lešokeng, ge mošemane yo monnyane yola a bilego, a bapala kgwele go tšwa sekolong, gomme a re fa matena a gagwe. . .”

¹⁰⁸ Bjale, mošemane yo monnyane yola, ke nyaka go bolela se sengwe go bašemane ba bannyane ba. Le a bona, mošemane yo monnyane yola o bile le matena a mannyane, e be e se selo eupša feela dipisikiti tše tlhano tše nnyane le dihlapa tše pedi tše nnyane. Bjale, ge feela mošemane yo monnyane a bile le ona ka seatleng sa gagwe, e be e sa re selo, feela go lekanela go iphepa yenamong, eupša ge a file bonnyane bjola a bilego nabjo godimo go Jesu, lebelelang se bo se dirilego. Bjale, re ka no ba le nthatana ye nnyane, ga se bontši kudu go rena, eupša ge re ka no dumelela Jesu go ba le yona, se A tla se dirago ka seo! O fepile batho ba dikete tše tlhano.

¹⁰⁹ Ke kgona go kwa Johane yo moswa a re, “Le tseba se ke se dirilego? Ke nametše godimo ka morago ga leswika, gomme ke Mmone ge A tšere pisikiti yela le go e ngwatha le go e bea godimo ka go seroto. Gomme ke šeditše mosepelo wo mongwe le wo mongwe thwi godimo ga legetla la Gagwe. Gomme ge A obeleditše seatla sa Gagwe morago, ge A thomile morago, go be go le feela seripa sa pisikiti, eupša nako ye A ilego go bea seatla sa Gagwe godimo ga yona, go bile le pisikiti ka moka, gomme O e ngwathile le go e bea fase gape.”

¹¹⁰ Ke nyaka go le botšiša, baena, ke mohuta mang wa athomo A e tlemolotšego fale? E sego korong go godišwa le go dirwa ka go yona, mafelelong, borotho, eupša e be e šetše e le borotho, bo pakilwe; e sego hlapi ye e bego e swanetše go bolawa gomme morago ya gadikwa, eupša e šetše e gadikilwe le go lokela. O dirile eng?

¹¹¹ Go ya go laetša ge—ge re rata go tlemolla bonnyane bjo re nago nabjo go Yena! E no tšea tumelo ye o bilego nayo go tla godimo fa ka yona bošegong bjo, le go e bea ka seatleng sa Gagwe le go tleleima phodišo ya gago, le go ya ntle le yona. Le a bona? Šetšang se se diregago.

¹¹² Gomme o rile, “Ge ke šeditše seo, ke be ke kgodišegile ka go tseenelela gore Yoo e be e le Jehofa. Gomme ge ke Mo lebeletše ge A eme fale, a se a thantshelwa nthatana ga go kgathale se se bego se direga, feela go homola ka mo A bego a kgona go ba, a ngwatha yeo, ebile O bonagetše boka Jehofa go nna ge A eme fale a ngwatha borotho bjola le go bo fetišetša ntle go batho bale ba swerwego ke tlala.”

¹¹³ O rile, “Bjale go nna, go rarologile go ya go ile gore Yoo ke Jehofa. Gomme Yena ga se, feela motho, Yena ga se feela moprofeta, Yena ke Morwa wa Modimo. Yena ke Tabarenekele ye Jehofa a dulago ka go yona, gobane O hlotše borotho bjo.”

¹¹⁴ Gabotse, e ka no ba e bile Simone, le a tseba, yo a tsebilego se sengwe ka dilo tšela le yena, yo a emeletšego gomme a

re, “Gabotse, seo ke se sebotse kudu, Johane. Eupša se se ntshwentšego pele ge Andrea a etla, o mpoditše go ne Moprofeta tlase fale, gabotse, ke be ke sa kgone go dumela seo. Eupša ke a elelwa papa wa ka o mpoditše gore ge Mesia a etla gore O be a tla ba Moprofeta. Gomme ge ke ile tlase kua letšatši lela gomme. . . le Andrea, gomme ke Mo lebeletše ka sefahlegong, gomme A lebelela go nna gomme a re, ‘Leina la gago ke Simone, o morwa wa Jona,’ seo se ile sa e ruma go ya go ile go nna. Ke tsebile yoo e be e le Yena, gobane re bile le mengwaga ye makgolonne ntle le Moprofeta yo gomme šo O tla go lefelotiragalo. Gomme ke a tseba e be e le sehla, nako e be e lokile, gomme go be go tlemega go ba Yena.”

Bjale, elelwang, Jesu ga se a e dira makga a mane goba a mahlano, O e dirile gatee, gomme seo se e rumile. Ba be ba loketše; ba tsebile gore Yoo e be e le Yena.

¹¹⁵ E ka no ba e bile Filipi, ka nako yeo, o phagametše godimo gomme o rile, “Simone, ke be ke eme fale. Le ge mohlolo o se wa dirwa go nna, o dirilwe go wena, efela, ke dumetše, gomme ke be ke kgodišegile kudu go fihla ke kitimela go dikologa thaba le go hwetša mogwera wa ka fa, Nathaniele. Gomme ge ke mo tlišitše morago, ke mmoditše ka ga se se diregilego, le se se diregilego go wena, le ka fao re tsebilego gore le e be e le leswao la Kriste, se ke se Lengwalo le rilego O be a swanetše go se dira.

¹¹⁶ “Gomme ge o etla godimo ka Bogoneng bja Gagwe, O go lebeletše gomme o rile, ‘Bonang MoIsraele, yo ka go yena go sego bomenetša.’ Gomme o rile go Yena, ‘Rabi, O ntsebile bjang?’ Gomme O rile, ‘Pele Filipi a go bitša, ge o be o le ka tlase ga mohlare, Ke go bone.’”

¹¹⁷ Gomme Nathaniele a ka no ba a tabogetše godimo ka nako yeo, a re, “Gomme seo se e rumile go nna! Ke wetše maotong a Gagwe, fale go eme moprista wa ka, gomme a mpha tebelelo ya ditšhila, eupša ga se e dire phapano ye e itšego o be a *molebelelo* bontši gakaakang, ke be ke šetše ke lebeletše ka Beibeleng le go bona gore Yoo e be e le Mesia. Kafao ke wetše maotong a Gagwe gomme ka re, ‘Wena o Morwa wa Modimo, Wena o kgoši ya Israele.’”

¹¹⁸ Oo, nna! A o be o ka se rate go ba ka kopanong ya bopaki, o dutše ntle kua o tekateka ka sekepeng se sennyane sela? E ka ba ka nako yeo, mohlomongwe—mohlomongwe Nathaniele o thomile go tumiša Morena. Gomme o rile, “Dula fase. O šikinya sekepe. Dula fase.” Le a tseba.

¹¹⁹ Le a tseba, go na le se sengwe ka ge o eya go bolela ka botho bja Modimo, o nyama gohle, o a thantshelwa, le a tseba, maikutlo. Yo mongwe o re, “Ga ke dumele go bodumedi bja maikutlo.” Gabotse, bokaone o boloke se o nago naso, gona. [Ga go selo go theipi—Mor.] Nnete. Kafao ge bodumedi bja gago bo

se ne maikutlo a manyane ka go bjona, bokaone o boloke selo. Yeo ke nnete.

¹²⁰ Gomme ba swanetše, ba hweditše...sekepe sa kgale se swanetše go be se be se šikinyega tikologong gabotse ge bohle ba ile go paka. Gomme e swanetše go ba e bile Andrea nako yeo, o nno se kgone go e swara botelele bjo bo itšego, o rile, “Baena, motsotso feela, bohle re elelwa tlase ka Sikara letšatši lela, gore ka fao A re rometšego ka toropongkgolo, le go reka dijo tše dingwe, gomme a nyaka go tlogelwa a nnoši godimo ka nageng yela ya Samaria. O re boditše O be a na le tlhoko ya go feta fao, Tate o be a Mo roma ka tsela yeo. Gomme kafao bohle re—re maketše gobaneng A dutše a nnoši? Gomme re ya ka toropongkgolo, gomme le tseba ka fao ba re swerego.

¹²¹ “Tseleng go boweng, le elelwa ge re be re etla godimo ka dithokgweng morago kua? Re Mo kwele a bolela, gomme go be go le mosadi a swailwe wa tumo ye mpe, gomme o be a bolela le Yena. Go se tlwaelege kudu go monna wa go hlomphega go bolela le mo—mo mosadi wa mohuta wola. Gomme re ngwegetše godimo ka morago ga dithokgwa go hwetša se A be a tla se bolela go yena. Gomme ke kgona go no Mo kwa... Se bohle re se boletšego, ‘Mo šetšeng a mmotša. Ka kgonthe O tla mmotša moo a lego. O tla mmotša gobane yena ke, mosadi yo mobjalo a lego. Ke a eleletša ka kgonthe O tla mo omanya gabotse.’

¹²² “Gomme le elelwa ka fao bohle re bego re lokela go Mo kwa a mo omanya, ge A rile go yena, ‘Ntlišetše seno.’ Gabotse, re naganne seo se be se tla, gore Mong wa rena o be a tla amana le motho boka yola, wa maemo a fase, Mong wa rena. Le elelwa ka fao bohle re lebeletšego go makala seng sa rena? Kafao re nno bobama fase ka morago ga dithokgwa go bona se A bego a tla se bolela.

¹²³ “Gomme ge poledišano e ile pele e bolela, gomme morago ga lebakana ba boletše ka bodumedi, gomme kafao O rile go yena, ‘Sepela, hwetša monnamogatša wa gago, gomme le tle fa,’ gomme o rile, ‘Ga ke ne monnamogatša.’

¹²⁴ “Gomme le elelwa se bohle re se nagannego? ‘Yeo ke nako ye nngwe re bonego Mong wa rena a swerwe ka molabeng.’ O be a le pošo. ‘Ga ke ne monnamogatša.’ Gomme le elelwa ka fao re bego re hloka mohemo, baena, bohle ba rena? Mong wa rena o mmoditše gore o bile le monnamogatša, gomme šo o e gana ka go tseenelela, ‘Ga ke ne monnamogatša e ka ba ofe.’ Gomme re lebelelane seng sa rena ka go makala. Ka fao re bego re sa kgone go dula go homola feela nakwana!” Seo ke se e lego bothata ka kereke lehono, ga e kgone go dula go homola motsotso. Le a bona?

¹²⁵ “Kafao nako yeo re bona Mong wa rena, ge A eme ka go hlomphega ka hlogo ya Gagwe fase, le go lebelela godimo go yena, gomme o rile, ‘Mosadi, o boletše therešo. O a rereša, o Mpoditše therešo.’ Gomme ka gona re maketše, ‘Fa bjale, O

thea dihlapa go dikologa ka tsela ye nngwe ka yona. O rile, sa pele o rile, “O na le monnamogatša,” gomme o rile, “Ga ke ne monnamogatša,” gomme bjale O amogela gore o boletše therešo.’ Gona le elelwa ka fao re ikwetšego, baena?”

¹²⁶ Gomme bohle ba bona ba rile, “Ee, re a elelwa. Dulang le iketle, le se šikinye sekepe, le a bona. Re kgole ntle fa bjale.” Gomme kafao bohle ba ile ba thantshelwa, “Ee, ke elelwa seo,” bohle ba bona ba bolela.

¹²⁷ Gomme o rile, “Le a elelwa, nako yeo, mantšu a go latela? ‘O boletše therešo. Ka gore o bile le bannabagatša ba bahlano; gomme yo o phelago le yena bjale ga se wa gago.”

¹²⁸ Gomme ka gona re šeditše *karabo* go mosadi. Gomme sefahlego sa gagwe se ribamile, mahlo a gagwe a phadima, Sengwe ka gare ga gagwe se swere Mollo, gomme o rile, ‘Mohlomphegi, ke a bona gore O Moprofeta.’ Bjale, re maketše ka fao Mosamaria yola wa tumo ye mpe, mosadi wa molahlwa a bego a tla ba le tsebo go tseba gore Monna yo e be e le moprofeta.

“Gomme ge A tšwetšepele a bolela, o rile, ‘Re a tseba gore Mesia, ge A etla, O ya go re botša dilo tše. Eupša Wena o Mang?’

“Gomme O rile, ‘Ke nna Yena yoo a bolelago le wena.’ Gomme re hwetša gore o . . .

¹²⁹ “Ga se re kgone go itshwara gape, re be re thabile kudu go bona gore Mong wa rena o be a rereša, gomme diprofeto tša Gagwe di be di nepile, go fihla re goeleditše ka lethabo, le go kitimela godimo pele ga Gagwe. Gomme o tlogetše pitša ya meetse gomme a kitimela ka toropongkgolo, gomme le a elelwa, banna bohle ba toropokgolo ba tlile ntle kua.”

¹³⁰ Bjale, gabotse mosadi yola o be a se a dumelelwa go dira seo. Aowa. O . . . Ge le tseba tlwaelo ya bohlabela, le metlwae, ga go yo a bego a tla mo theetša, o be a le mosadi wa tumo ye mpe, ga go yo a bego a tla mo fa šedi ye e itšego. O be a sa kgone le go ya ntle kua, ke ka baka leo a bego a le ntle kua ka iri ya lesometee, o be a sa kgone go ya ntle le basadi ba go hlomphega. Šeba bona bohle mmogo, eupša fale ga se a kgone go e dira. Gomme kafao, fale . . .

¹³¹ Eupša ge a kopane le Jesu, gomme a hweditše seno go tšwa Sedibeng sela, yo mongwe o ya go mo theetša, ge eba ke semolao goba aowa. Yeo ke tsela ya go swana go lego bjale, motho yo a kilego a hwetša seno go tšwa Sedibeng sela, yo mongwe o ya go theetša, ke phetho. Ge eba kereke e go botša go dula fase goba aowa, se sengwe se ya go direga.

¹³² Ke nagana baena ba ka ka go dikerekemaina tšohle tša rena tša go fapana . . . Ka—ka nnete ke dumelelana le Hudson Taylor, moromiwa yo mogolo go ya India, ge mošemane yo moswa wa Mochina a phološitšwe, gomme o tlile godimo, gomme o rile, “Mna. Taylor, ke tla swanela go tšea mengwaga ye mene ya—

ya saekolotši, le go ya pele, le mengwaga ye *mentši bjalo* ka *kholetšheng*.”

¹³³ Mna. Taylor o rile, “O se dumelele kerese go phadima ge e swele seripa, efa seetša sa yona ge e sa nno gotela.” Yeo ke nnete. Bothata bja yona ke lehono, ge mošemane a hwetša pitšo ya Modimo ka pelong ya gagwe, a tladitšwe ka Moya wo Mokgethwa, o ya go tše dingwe tša dirapa tše tša mabitla, goba, diseminari, goba eng . . . Ntshwareleng. Go le bjalo, o ya tlase kua ka go setsidifatši sela, gomme ba tšea go tšwa go yena se sengwe le se sengwe seo Modimo a se beilego ka go yena. Yeo ke nnete.

¹³⁴ Ke a dumela iri e tlile . . . Ga ke dumelelane le dikolo tše kgolo tše tša thutamodimo ya go aga lehono. Re bolela ka go Tla ga Morena batametše thwi, le go aga dikolo tše kgolo le se sengwe le se sengwe. Gobaneng, tiro ya rena beng e bolela kudukudu go feta mantšu a rena! Re ka kgona bjang go be re bea bontši kudu ka meagong, le go ya pele, le dikolo tše kgolo, le go ya pele, gomme re re Morena o etla?

¹³⁵ Ke bolela se: Ka pela ge Modimo a gotetša kerese, tloga. Ge o sa tsebe gape, e no ba botša ka fao e goteditšwego. Yeo ke phetho. A nke ba gotetšwe, gomme ba tla botša yo mongwe gape, gomme re tla ba le nako ya go gotetša kerese. Seo ke se re se hlokago go le bjalo, sebakeng sa thutamodimo ye ntši kudu, kerese e goteditšwe. E no bolela ka fao e goteditšwego. Feela . . . Seo ke sohle o swanetšego go se bolela, o se leke go e rera, e no bolela ka fao e goteditšwego, “Ke tladitšwe ka Sengwe seo—seo se tšhumago.” Yeo ke phetho.

¹³⁶ E no bolela ka nako ya go gotetša, ka fao e goteditšwego, gomme e tla fa Seetša ge se eswa. A nke seetša se tee sela, morago se sengwe, gomme morago o bolela ka fao se goteditšwego, gomme o bolela ka fao se goteditšwego, go tla ba Seetša tikologong fa morago ga lebakana ge re ka no bolela bontši bjoo.

¹³⁷ Bjale, ka fao mosadi yo, o be a sa kgone go homola! O kitimetše ka toropongkgolo, gomme bopaki bja gagwe bo be bo hudua kudu go fihla ba sa kgone go mo hlokomologa, kafao ba ile ntle. Gomme Beibele e boletše gore batho ba Sikara ba dumetše Jesu (Bjale, ga se nke A dira seo gape go bona.), ka baka la bopaki bja mosadi bjoo, bo mmoditše seo a se dirilego.

¹³⁸ “Le elelwa fale, baena? Bohle re be re maketše,” go boletše Andrea. “Bohle re be re maketše ka fao gore Basamaria bale godimo fale . . . Karolo yela ya mobu yeo—yeo Jakobo a e filego morwa wa gagwe Josefa, gomme o be a na le sediba kua, gomme karolo yela ya mobu ye e bego e filwe . . . Gomme mo mosadi yo wa Mosamaria, selo sa ditšhila go rena, gomme efela, o e lemogile mo motsotsong, ebile le ka go tumo ya gagwe ye mpe.

¹³⁹ “Ga go pelaelo eupša ka ntlong ya gagwe ye nnyane ya bommalegogwana,” yeo ke ikemišeditšego go rera ka yona mo—mo mosong, Morena ge a rata, “lefelole lennyane lela, o bile

le Disekorolo tsoko tša Modimo fale, moo a bego a bala ka ga Modimo, le go tseba gore O be a swanetše go bonagala ka sebopego sela. Gomme ka fao bohle re bego re tšhogile!”

140 Gomme oo, ke eleletša sekepe se ile sa kgehlemana gape gape, yo mongwe a goelela le go tumiša Modimo, gomme e ka no ba e bile Petro a rilego, “Baena, go ne dikgato tše masomenne botebo fa. Iketleng.”

141 Mateo o rile, “Gabotse, o nagana gore ke . . . o ya go feta ntle le nna go bolela se sengwe?” Le a bona? Gomme o rile, “A nke ke le botše se sengwe. Le elelwa mosong wola gore bohle re ile pele ga Gagwe go lokiša kopano tlase ka Jeriko?”

“Oo, ee,” go boletše Luka, “ke elelwa seo gabotse.”

142 “Gomme re hweditše rakgwebo yo monnyane tlase kua ka leina la—la Sakeo, yo monnyane wa nthatana, moisa yo mokopana. Le elelwa ka fao a bego a le lenyatšo ka gona, ka fao a bego a le manganga? Mojuda yo monnyane wa nko ya huku, le go ba swele ka mo a bego a kgonaga go ba! Gomme re mmoditše ka ga Mesia, ‘Oo, hwetša!’

143 “Le elelwa mosadi wa gagwe, Rebeka, yo e bego e le modumedi wa therešo, ka fao Jesu wa Nasaretha a mo diretšego selo se segolo? Gomme o rile, ‘Ke rapediša Sakeo.’ Gomme re naganne ge re ile godimo restoranteng yeo a bilego le yona le go ja, o be a ka se re lefiše bakeng sa yona. Ge a hweditše re be re le barutiwa o re dirile re lefe gabedi, gomme o rile, ‘Ešwang ka fa ka dilo tše bjalo ka tšeo. Ke nna mogwera wa Rabi Kabinski, goba, Labinski, goba . . .’ Ke a holofela ga go yo motee ka fa ka mogkwa woo. Kafao go le bjalo, ge ke dirile, ntshwareleng, le a bona.

144 Gomme o rile, “Mosong wa go latela (Rebeka o rapetše bošego bjohle gore . . .), Jesu o be a eya go etela toropokgolo, gomme kafao o naganne gore o be a mo nyaka a tle go kgomana le Jesu. O be a mmoditše ka ga Yena go beng Moprofeta, gomme O be a le Moprofeta yoo Moshe a boletšego ka yena. Eupša, oo, o be a le manganga! Dikholofelo tša gagwe di be di le go tšhelete, gomme o be a sa tshwenyega ka selo ka ga Jesu wa Nasaretha. Eupša le a tseba, ge Rebeka a re boditše o rapetše bošego bjohle botelele . . . Le a tseba, thapelo e fetola dilo.”

145 Yeo ke nnete, bagwera. Le a tseba, thapelo e fetola monagano wa Modimo. Modimo o rometše moprofeeta godimo go monna letšatši le lengwe gomme o rile, “Bea ntlo ya gago lenaneong; o ya go hwa.” O retolletše sefahlego sa gagwe lebotong, gomme o rapetše ka tiišetšo, gomme o rile, “Morena, ke a Go kgopela go nkela šedi, ke sepetše pele ga Gago ka pelo ye e phethagetšego. Ke hloka mengwaga ye lesometlhano.” Gomme go be go lebege o ka re Modimo a ka be a boletše thwi morago go kgoši, o be a le monna yo mogologolo ka nageng, eupša O bolela le moprofeeta

wa Gagwe. O nno botša Jesaya, “Eya morago gomme o mmošše, Ke mo kwele gomme Ke ya go boloka bophelo bja gagwe.”

A o ka eleletša go goboga ga moprofeta yola, a eya godimo gatee go banna ba sešole, “Oo, moprofeta yo mogolo, go reng ka kgoši ya rena?”

“O RIALO MORENA, o ya go hwa.”

A eya godimo go batho ba go šokiša ba eme kgorong, “Go reng ka moprofeta wa rena . . . ? Moprofeta, go reng ka kgoši ya rena?”

“O RIALO MORENA, o ya go hwa.”

¹⁴⁶ Oo, ka fao ba bego ba lla! Ba etla thwi, ba eya ntle, “O RIALO MORENA, o ya go hwa.” Gomme morago, mo metsotsong e se mekae, šo o tla morago a re, “O RIALO MORENA, o ya go phela. O RIALO MORENA . . .” Go diregile eng? Thapelo e fetotše dilo. Thapelo e fetola dilo.

¹⁴⁷ Hlokomelang, gona bopaki bjo, “Sakeo yo monnyane wa kgale mosong wola, ge Rebeka a rapetše bošego bjohle, mosong wa go latela o tsoga ka leselaphutiana ka kgonthe, gomme o thoma go ipeakanya yenamong, le go kama maledu a gagwe, le go apara kobo ya gagwe ye kaonekaone, le a tseba, le go lokela go ya tlase ka toropongkgolo, gomme Rebekah o retologela godimo, le a tseba, gomme o lebele ntle ka leihlong le tee, gomme o rile, ‘Uh-huh. Ke a bona, ke a Go leboga, Morena. Go ya go loka. O ya kae mosong wo, monnamogatša wa ka wa go ratega?’

¹⁴⁸ “‘Oo, ke no ba ntle go itiwa ke moya.’ Gomme o ya tlase kgorong, gomme o hwetša a ka se kgone go fihla kua, go na le ba bantši kudu kua, ke yo mokopana kudu ka seemo. O ya morago tlase le go tšea kgamelo ya matlakala a toropokgolo, le go e kgoromeletša godimo kgahlanong le mohlare, o namela godimo ntlhoreng ya mohlare, o rile, ‘Ke a tseba O tla go theoga Mokgotha wa Letago fa, le go retologa go theoga Mokgoba wa Haleluya.’” Ka mehla O dira seo. “‘Kafao ke tla kopana le Yena thwi fa mo khoneng.’” Leo ke lefelo le lebotse go kopana le Yena.

“Kafao le a elelwa, baena, ka fao Sakeo a re boditšego ka yona?”

“Ee, re a e elelwa.”

¹⁴⁹ “Gomme o nametše godimo ka mohlareng wo, gomme o rile, ‘Bjale, ke yo monnyane kudu gore ge A feta kgauswi fa, a feta kgauswi fa, A ka se tsoge . . . Nka se tsoge ka Mmona, gomme A ka se tsoge a mpona, eupša ge ke namela godimo ka mohlareng wo, ke ka godimo ga lešaba ka moka, nka kgona go lebelela thwi fase le go Mmona, gomme ke tla no nyaka go Mo fa seripa sa monagano wa ka ge A feta ka tlase ga mo.’

¹⁵⁰ “Gomme ka gona selo sa pele le a tseba, gobaneng, o nno direga go nagana, ‘O a tseba ke eng? Rebekah o boletše gore Monna yola o be a le Moprofeta. Gomme ge A be a le Moprofeta, A

ka no lebelela godimo ka mohlareng wo gomme a mpona, gomme ke tla goboga, kafao ke tla Mo lokiša, A ka se mpone.' Kafao o thomile go gogela matlakala ka gare go mo dikologa, gomme o ikutile yenamong gabotse ka kgonthe. O dutše fase ka mphatšeng wa mohlare fale go gopa ditshetla go tloga go yena, le tšhila go tšwa paketeng, le a tseba, le go ya pele."

¹⁵¹ Eupša o tla dira dilo tša go nyefola ge o—o nyaka go bona Jesu, ga go selo se yago go ema tseleng ya gago. Ba ka ba bitša bapshikologibakgethwa goba e ka ba eng le nyakago. Wena, ge o na le monagano wa gago o phethilwe go bona Jesu, o tla ya go Mmona go le bjalo.

¹⁵² "Kafao o be a dutše fale moo makala a mabedi. . ." Bjale, leo ke lefelo le lebotse leo yo mongwe le yo mongwe a tlogo go lona, moo tsela ya gago le tsela ya Modimo di kopanago. "Gomme o dutše godimo ga lekala le, a goga matlakala gohle go mo dikologa, o rile, 'A ka se tsoge a mpona.' Kafao o itiretše mojako yenamong, letlakala le legolo fa, gore a kgone go gogela letlakala le godimo, le go lebelela, gomme a kgone go Mmona a etla, morago a le lahlela morago. O lebeletše gohle go dikologa, ga go tsela go Yena go mmona. Morago ga lebakana o kwele lešata."

¹⁵³ Le tseba se sengwe sa go tlabo? Ge Jesu a le tikologong, go ne lešata le lentši. "Kafao o Mmone a etla, O phagamišitše letlakala le, gomme o Mo šeditše, eupša Yena, go be go le se sengwe ka Yena seo se bonagetšego go fapana, O be a sa swane le banna ba bangwe. Re bona motheadihlapi yo mogolo a eya mmogo a re, 'Emelang thoko, baena. Ke maswabi, nka se kgone. . . re ka se kgone go le dumelela go Mo dikologa. O lapile, O be a rera bontši bja bošego. Tshwarelo, magagešo, re ka se kgone. . .'

¹⁵⁴ "Gomme ge A etla kgauswi, (Le elelwa se Sakeo a se boletšego?) O be a ne hlogo ya gagwe fase, O tlile thwi le go ema ka tlase ga mohlare, gomme ge A eme ka tlase ga mohlare, O lebeletše godimo, gomme O rile, 'Sakeo, fologa; Ke ya gae le wena bakeng sa matena.'

"Oo, le elelwa se Sakeo a se boletšego? 'Seo se e rumile. O tsebile bjang ke be ke le mang? Gomme O tsebile bjang ke be ke le ka mohlareng?'"

Sakeo, fa bošegong bjo, O tseba thwi moo o lego, le ke matlakala afe o ikutilego ka morago ga wona. Nnete tlwa.

¹⁵⁵ Yo mongwe wa bona a ka no ba a rile, "Feela. . ." Bjale, a re dumeleleng Mareka go paka gatee, gomme morago re tla tswalela. Mareka a ka no ba a rile, "Theetšang, le elelwa Baratimeo, se a se boletšego? O be a dutše fale mosong ohle, se sengwe le se sengwe, dikholofelo tšohle di be di ile, gomme o kwele lešata le etla go tšwa toropongkgolo. Gomme o diregile go elelwa, ge a be a dutše fale a ithuta, le go nagana, 'O a tseba ke eng? Ge nkabe ke phetše nakong ya baprofeta, thwi go

theoga mokgotha wo go tla Eliya le Elisa, letsogo ka letsogong, ba eya tlase go tshela Jorodane, ge nkabe ke phetše ka matšatšing ao, nkabe ke kitimetše ntle kua pele ga baprofeta bale, gomme ka wela fase, gomme ka re, “Oo, banna ba bagolo ba Modimo, nthapeleleng gore ke amogele go bona ga ka!” Eupša mmalo, moprista o mpotša gore matšatši a mehlolo a fetile.’

156 “Gomme e no nagana, dijarata tše lekgolo go tloga moo ke dutšego, mohlabani yo mogolo, Joshua, o be a sepela tikologong morago ga sekgalela se sengwe, gomme gateeteo o bone Monna a eme godimo kgahlanong le yena ka tšhoša e khwamotšwe, Joshua o khwamotše tšhoša ya gagwe, gomme a kitima go Mo gahlanetša, gomme o rile, “A O wa rena? A O wa lenaba la rena?”

157 “Gomme O phagamišeditše tšhoša godimo, gomme legadima la manyokanyoke la fofa go tloga go yona, gomme o rile, “Ke nna Mokapotene wa madira a Morena.” Gomme Joshua, mohlabani yo mogolo, o lahletše helemete ya gagwe fase, a bea tšhoša ya gagwe fase, gomme a wela maotong a Gagwe. E no nagana, yeo e be e le feela e ka ba dijarata tše lekgolo masometlhanu, goba makgolopedi go tloga moo ke dutšego.’

158 “Bonnyane o be a sa tsebe gore Mokapotene Mogolo yola wa go swana o be a le tseleng ntle go kgabola fale nako yeo.” Bonnyane batho ga ba tsebe gore Mokapotene Mogolo yola wa go swana, o thwi ka moagong wo, bošeng bjo. Ge go se bjalo, Beibele ke Puku ya go fapoša, O rile, “Kae kapa kae ba babedi goba ba bararo ba kgobokanego Ke tla ba leineng la bona . . . ba magareng ga bona, moo ba kgobokanego Leineng la Ka.”

159 “O kwele lešata.” Bjale, Mareka o go fa bopaki bja se a ka bego a mmoditše. “Gomme gateeteo go tlile kgauswi, lešata le le bjalo, gomme yo mongwe o rile, ‘Ke mang a fetago kgauswi?’ Gomme ba bangwe ba bona ba boletše *selo se tee le se sengwe*, gomme selo sa pele le a tseba, re kwele moprista a goelela ntle, gomme o rile, ‘E re, re kwešiša gore o tsoša bahu. Re na le serapa ka moka sa mabitla se tletše bona godimo mo, etla godimo mo gomme o tsoše yo motee wa ba.’”

160 Le a tseba, diabololo yola wa kgale ga se a hwa le bjale. Aowa, mohlomphegi, “Ge o le!” Yena wa go swana o beile lenkgeretla go dikologa sefahlego sa Gagwe, gomme a Mo itia hlogong ka phata, gomme a re, “Ge o le moprofeta, re botše ke mang a go iteilego, re tla go dumela.” Le a bona? Diabololo yola wa kgale wa go swana yoo a rilego, “Ge o le Morwa wa Modimo, re ne yo mongwe tlase fa, dira mohlolo wo. A re go bone o o dira.” Modimo ga a direle motho motlae.

Jesu o rile, “Ke tla go dira thato ya Gagwe, gomme ga Ke dire selo go fihla A Mpotša pele,” Mokgethwa Johane 5:19.

161 “Kafao Baratimeo wa go šokiša wa kgale wa sefoku o ile a kgoromeletšwa morago. Re kwele bohle, yo motee bakeng sa Gagwe, yo motee a re, ‘Hosiana go Moprofeta yo a tlogo Leineng

la Morena!’ Gomme yo mongwe a re, ‘Kgole ka moikaketši yo mobjalo!’ Lešaba la mahlakanasela le lebjalo!” Ka mehla go ne lešaba la mahlakanasela moo A lego.

¹⁶² Gomme re hwetša gore Baratimeo yola wa go šokiša wa kgale wa sefofu, ge o kile wa ba ntle ka Jeriko le go maraka moo a bego a dutše, go ya moo Jesu a bego a le, e be e le dijarata tše makgolopedi go nyakile.

¹⁶³ Fao lešaba lela, le lahlela kenywa ye e budulego go fetiša go Yena, le go ya pele, le go dira metlae ka Yena, eupša sefahlego sa Gagwe se bohlokwa se be se beilwe go leba Khalibari, O be a eya godimo go ba Sehlabelo sa lefase. Morwalo ka moka wa sebe o beilwe godimo ga Gagwe, Modimo o beile bokgopo bja rena bohle godimo ga Gagwe. O be a sepelela pele, a sa fe šedi ye e itšego go se ba bego ba se bolela, O be a tla dira se Tate a Mmoditšego go se dira, gomme seo se e rumile.

¹⁶⁴ “Gomme O be a eya pele ka ntle ga—ga Jeriko, a sepelela ka ntle ga toropokgolo, gomme selo sa pele le a tseba, sefofu Baratamio o rile, ‘Ke Mang? Yo ke Mang? Lešata lohle ke la eng?’

“Gomme yo mongwe o mo kgoromeleditše morago, ‘Oo, homola, o motho wa go se be bohlokwa,’ a mo kgoromeletša morago, mankeretla a gagwe a kgale, o emeletše go tšwa leroleng.

¹⁶⁵ “Go swanetše go ba go bile mosadi wa go ratega wa Mokriste, yo a bego a le modumedi go Morena Jesu, ba ka se tsoge ba ema go bona monna wa sefofu a kgoromeletšwa gohle, ka mehla ba botho, bahlanka ba Jesu ba bjalo, kafafo mosadi yo moswa yo a ka no ba a ile tlase le go re, ‘Mohlomphegi, a nka kgona go go thuša?’

“Gomme, ‘Ee, Meme. Ke nyaka o mpotše, lešata lohle ke ka eng?’

“‘Oo, a o mosetsebje mo?’

“‘Aowa, ke godišeditšwe mo.’

“‘Gabotse, Yoo ke Jesu wa Nasaretha, Moprofeta wa Galelia.’

“‘Ga ke kwešiše.’

“‘A o tseba Mangwalo?’

“‘Ee.’

“‘O a tseba gore Jesu wa Nasaretha, Moprofeta yo Moshe a rilego o tla tsošwa? O feta kgauswi, Yoo ke Yena.’”

¹⁶⁶ “Ka gona ka pelapela Baratimeo, go ile gwa sa go yena, ‘O kgole kudu go nna go Mo dira go nkwa mmeleng, ka lebaka la gore go ne batho ba bantši kudu. Eupša ge A le Modimo, ge yoo e le Morwa wa Dafida, ke sa ntše nka kgona go Mo kgwatha.’ A ka no ba a wele ka matolo a gagwe gomme a re, ‘O Modimo, nkwe, Wena Morwa wa Dafida, nkgaogete!’ A ka be a se a ke a

kwa ya gagwe, ka nnete ka ditsebe tša Gagwe, eupša tumelo ya mokgopedi yo motee yola wa sefoku e emišitše Jesu.”

Ke tla rata go rera letšatši le lengwe, goba nako ye nngwe pele ke tloga: *Gomme Jesu A Šišimala*. Ya.

“Gomme O šišimetše, gomme O be a sa tsebe. E be e le eng? Tumelo ya gagwe e Mo emišitše, gomme morago O mo tlišitše.”

¹⁶⁷ Oo, a kopano ya bopaki! Ba ile ba swanela go lebelela gohlegohle, go be go eba thari. O rile, “Baena, bokaone re gogele godimo lešing.” Kafao ba thomile go goga gape.

¹⁶⁸ Le a tseba ke eng? Diabolo o ba bone ntle kua ntle le Yena, gomme o lebeletše godimo ntlhoreng ya thaba, o rile, “Fale ba tlogile ntle le yena, gomme bjale ke sebakabotse sa ka.”

¹⁶⁹ Bjale, ke bolela se ka lerato, baena. Le a bona? Ke a makala ge eba seo ga se seemo bošegong bjo. Ge e sa le tsoeletšo e kgatlampana, katlego ye kgolo ya kereke, re agile meago ye meswa, re bile ka go mananeo a magolo, re dirile se sengwe le se sengwe se segolo seo se kago go dirwa; le go leka go bapela le Lutheran, Methodist, le Katoliki, go hwetša maloko a mantši ka gare nako yohle. Ke a makala ge eba, lenaneo la rena le legolo, ge eba ga se ra tloga ntle le Yena ka go mafolofolo a rena.

¹⁷⁰ Ba be ba thantshetšwe kudu, ga se ba Mo phegelela, ba tlogile ntle le Yena. Gomme seo e be e le sebakabotse sa diabolo go—go thoma go bona nako yeo. Kafao o tlile tlase ka maatla a gagwe ohle, o rile, “Ke ba hweditše bjale ntle le yena, kafao ke tla ba nweletša ntle kua lewatleng lela.” Gomme a thoma go budulela mohemo wa gagwe ka ntle ga mafaufau.

¹⁷¹ Gomme o thomile go e budulela gape, “Matšatši a mehlolo a fetile. Yohle ke maikutlo. Ke bohlanga bjohle. Ke sohle *se, sela*, goba *se sengwe*.”

¹⁷² Gomme dikepe tše nnyane di kgehlemana thata, le a tseba, ntle le seila. Sekepe sa tlala meetse, mahuduo a robega, kota ya seila ya tente ya robega ka bobedi, gomme diphefo di be di se bethile, le go se tšokatšokiša gohlegohle. Go bonagetše eke dikholofelo tšohle di be di ile gore ba ka tsoge ba phološwa.

¹⁷³ Eupša le a tseba ke eng? Ge A ba rometše kgole, le tseba se A se dirilego? O nametše thaba ya godimodimo e bego e le ntle kua. Bokgole bjo o yago, bokgole bjo o ka kgonago go bona. Kafao O nametše godimo ga thaba gore A kgone go ba šetša.

¹⁷⁴ Gomme ge A hwile kua Khalibari, gomme O romile barutiwa ba Gagwe go ya ka lefaseng lohle: “Gomme maswao a a tla latela bona ba ba dumelago,” O nametše go tloga Khalibari go feta letšatši, ngwedi, le dinaledi, thwi pele godimo go feta Tsela Tšhweu ya Maswi. O ile go fihla A fetile Legodimo. Beibele e rile O dutše ebile ka godimo ga Legodimo, a lebelela fase godimo ga Legodimo. O fihlile fale gore A kgone go bona gohlegohle

go legohle. “Gomme leihlo la Gagwe le godimo ga phorogohlo,” gomme ke a tseba O šeditše bošegong bjo.

175 Ga go kgathale re bonagala re tšokatšokišwa gakaakang ke mahuduo a makae a robegilego, ke bontši gakaakang kholofelo yohle e ilego, O sa ntše a šeditše, “Nka se tsoge ka le tlogela goba go le lahla.”

176 Oo, ka go nako yela ya tlalelo tsošetšo e be e fedile, gomme sekepe se be se tletše meetse, gomme go be go lebega o ka re se sengwe le se sengwe se be se ile, dikholofelo tšohle di be di ile, gomme šo O a tla, a sepelela go bona godimo ga lewatle, a sepela godimo ga lewatle. Go a tla, go sepela godimo ga lewatle, gomme karolo ya go tla ba ka yona, Selo se nnoši seo se bego se ka ba thuša, ba be ba Se boifa. Se be se lebega boka sepoko, se be se lebega boka moya, gomme ba goeditše ka poifo.

177 Seo ke selo sa go swana lehono. Selo se nnoši seo se kago go re phološa ke Beibele, le tshepišo ya Modimo, le Moya wo Mokgethwa le rena. Se lebega boka sepoko go batho, gomme ba goeleta ka poifo. Eupša fa go tla sela se sebose, Segalontšu se sennyane sa go homola: “Se boifeng; Ke Nna.”

178 Gomme ke a dumela, bošegong bjo, ge A ka kgona go sepelela ka gare godimo ga kopano ye bošegong bjo, a dira mehlolo ya Gagwe, gomme le makala se se diregago, “Ke eng e dirago seo? Ke mohuta mang wa mathaithai? A ke—ke. . . go bala monagano tsoko? Ke eng?” O tla goeletša morago go lena, “Se boifeng; ebang le tlhohleletšo ye botse; Ke Nna,” a phethagatša tshepišo yeo A rilego O tla e dira.

Eupša sona Selo se se bego se kgona go ba thuša, gomme Selo se nnoši se bego se kgona go ba thuša, ba be ba Se boifa.

179 Gomme lehono, ke selo sa go swana, ba boifa go swara Moya wo Mokgethwa, ba boifa go dumela Molaetša wa Modimo, ba boifa go dumela Moya wo Mokgethwa ge ba O bona o šoma magareng ga bona. Ba tla re, “Bjale, ema motsotso, ga ke tsebe ge eba e ka ba ya ka goba aowa.” Ke ya “mang kapa mang a ratago,” phodišo ke ya yo mongwe le yo mongwe, phološo ke ya “mang kapa mang a tla tlogo,” mang kapa mang.

180 “Se boifeng; Ke Nna.” Ke Kriste, ga se A hwa, O a phela go ya go ile, gomme o swere dikgonyo tša lehu le hele. Gomme ga se gona se kago go gobatša. A le dumela seo? Modimo o dula e le Modimo. Ge A kile a ba Modimo, O sa le Modimo. A le dumela seo? Amene.

181 Ke le swaretše thari bošego bjo bongwe le bjo bongwe, ga ke ye go e dira bjale. Ke ba bakae ka mo ba se nago karata ya thapelo, ba ba sa ntsebego, goba ga ke go tsebe, gomme o rata go bolela gore “Ke dumela molaetša wola, therešo gore Jesu Kriste o magareng ga rena”? Phagamišetšang diatla tša lena godimo, e ka ba kae le lego. Bjale, a nke Modimo wa Legodimo a tle a sepela

ka gare godimo ga lewatle la go biloga, ge o makala, “Ke ya go hwetša bjang karata ya thapelo? Ke ya go rapelelwa bjang?”

¹⁸² Ga se. . . O ka no. . . Nka no go rapelela, ka bea diatla godimo ga gago, baena ba ka no rapela, re banna, yoo ga se Motho go kgwatha go le bjalo, re banna ka kwelobohloko go lena, eupša Yena go kgwatha ke *Yena*, yoo ke Yena, go *Mo* kgwatha. Gomme ge yo mongwe gape a ka kgona go Mo kgwatha, ka nnete o ka kgona, ka gore O a kgwathega.

¹⁸³ Beibele e boletše gore O a swana maabane, lehono, le go ya go ile. Beibele e rile Yena ke Moprsta yo Mogolo, gonabjale, yoo a kgonago go kgwathwa ke maikutlo a mabofokodi a rena. Gabotse, ge A le Moprsta yo Mogolo wa go swana, O tla dira ka tsela ya go swana yeo A dirilego ge yo mongwe a Mo kgwathile mo letšatšing lela ka tumelo. Ke ba bakae, letšatši lela le mosadi ka taba ya madi, ke ba bakae ba bego ba Mo kgwatha, ba bea matsogo a bona go Mo dikologa ba re, “Rabi, re thabile go Go bona, Mohlomphegi,” go ya pele ka mokgwa woo, gomme O eme gomme O rile, “Yo mongwe o Nkgwathile?”

¹⁸⁴ Gomme Petro o Mo kgadile, mo o ka rego o re, “Mong, a O a tseba gore seo ke go nyatšiša go leemo la Gago—la Gago? O botšiša ke mang a Go kgwathilego, ge yo mongwe le yo mongwe ba na le diatla tša bona godimo ga Gago, ba Go kgwatha.”

¹⁸⁵ O rile, “Ee, eupša wo ke mohuta wa go fapana wa kgwatho.” Le a bona? “Ke fokotše, maatla a tšwile go Nna.” Gomme O lebeletše gohle go dikologa godimo ga batheeletši, gomme O hweditše mosadi yo monnyane. Oo! Gomme O boletše eng go yena ka taba ya gagwe ya madi? “Tumelo ya gago e go phološitše.” Ge yoo e be e le Jesu maabane, yoo ke Jesu lehono. Gomme ngwanešu, kgaetšedi, a nke ke go botšiše se sengwe.

¹⁸⁶ Bjale, o ka se bone Jesu ka mmeleng wa nama go fihla A tlela Kereke ya Gagwe. Eupša se sengwe le se sengwe A bego a le sona, tšohle—tšohle Modimo a bego a le tšona O di tšholletše ka go Jesu, gomme tšohle Jesu a bego a le tšona O di tšholletše ka go Kereke. O a swana, O ka Kerekeng, badumedi. Bjale, ge—ge monna a etla mo, bjalo ka ge ke boletše bošego bjo bongwe, ka mabadi a dipikiri le—le mabadi a meetlwa godimo ga hlogo ya gagwe, yoo a ka kgona go ba mofori. Eupša ge o bona bjona Bophelo bja Kriste bo tšweleditšwe! Mareka . . . Johane 14:12, O rile, “Yo a dumelago go Nna, mediro ye Ke e dirago o tla e dira le yena; bontši go feta bjo o tla dira; gobane Ke ya go Tate wa Ka.”

¹⁸⁷ Eupša go bonala o ka re batho ba bangwe ba nagana gore, gore banna ba ba rwelego dimpho tše tša badiredi ba swanetše go ba moprista yo mongwe yo mogolo, serutegi se sengwe se segolo. Ke na le ya ka ya mathomo go tsoge ka e bala ka go histori, yeo Modimo a kilego a e šomiša ka mokgwa woo. Mpotšeng mo a lego, le ge e direga. Modimo ka mehla o tšea lefeela, gore A kgone go bontšha letago la Gagwe ka go lefeela.

188 Lebelelang se A se kgethilego: batheadihlapi, ba go se rutege, ba go hloka tsebo, gore A ke a iponagatše Yenamong. O ka no bolela go nna ka Paulo. Paulo o rile o ile a swanela go lebala se sengwe le se sengwe a kilego a se tseba go tseba Kriste, o hwile tšatši ka tšatši gore A ke a tsebe Kriste. Gomme o rile, “Ga se ka tsoge,” o boditše Bakorinthe, “Ga se ka tsoge ka tla go lena ka mantšu a magolo a thuto, le setswerere, boka banna ba go rutege, gobane tumelo ya lena e tla agwa ka go se sebjalo. Eupša ke tla go lena ka maatla a Moya, gore tumelo ya lena e be ka go—ka go Kriste, ka Moyeng.”

189 Modimo o tšea banna ba e ka ba mang A dumago go mo tšea, ga go selo, gore A ke a iponagatše Yenamong. Seo ke se se Mo dirago Modimo, ga se motho nako yeo, ke Modimo a šoma ka go se sengwe seo e sego selo, go netefatša gore ke Modimo. Ge monna a be a le se sengwe, o ka kgona go lebelela monna, eupša ge monna e se selo, gona e swanetše go ba Modimo. Gomme ka go taba ye, ga go motho a ka kgonago go e dira, e swanetše go ba Modimo, gomme ke go phethagatša tshepišo ya Gagwe. Bjale, re tseba seo.

190 Gomme mogwera, ema motsotso feela, šikinya kelello ya gago—ya gago—ya gago, šikinya ka—ka karolo ya . . . budula lerole go tloga go ditshepišo tša Modimo le go bona ge eba ga se re tshepišwe se ka matšatšing a mafelelo. Bjale O tšwelela magareng ga batho ba Gagwe, gomme O fa, bošegong bjo. Gomme ga go kgathale O tla ntlotša gakaakang, O swanetše go le tlotša ka tsela ya go swana. Gomme ke tumelo ya gago, e sego ya ka, ke tumelo ya *gago* ye e dirago selo, e sego ya ka le gatee. Ke no ba sedirišwa, gomme o no ba sedirišwa, gore ge batho ba bangwe . . .

191 Bjale, ge se se ratha yo mongwe ka—ka karata ya thapelo yo a yago go rapelelwa, ga ke e re ka tsela yeo. Eupša ke nyaka go le botšiša se sengwe. Bontši bja lena ntle fale . . . Ga ke bone motho eupša bale bao ke ba tsebišitšego, ga ke . . . Ebile ga se ke ba bone.

192 Ke fošitše yo motee, Ngwanešu le Kgaetšedi Dauch, ba dutše godimo *fa*, tsela yohle go tšwa godimo ka Ohio, ba tla tlase mo. Ke duma ge nkabe ke na le nako go fa bopaki bja bona. Ka fao monna, bogolo bja mengwaga ye masomesenyane, a ka šiteletšago tšona dilo, gomme o re latela e ka ba kae re yago! Ya, yeo ke nnete, gobane o a dumela. Gomme ka fao bopaki bja bona bo tla go tšhošago! Eupša ka ntle ga Ngwanešu le Kgaetšedi Dauch ba dutšego fale, gomme ke a dumela Ngwanešu le Kgaetšedi Simpson (Bjale, Sothmann le bona ba morago ka *fale* felotsoko, eupša ga ke tsebe.), Ga ke tsebe motho, Ngwanešu Roberson, gomme ebile ga ke tsebe se leina la modulasetulo le lego. Yeo ke therešo, nka se kgone go le botša leina la gagwe gonabjale ge eba ke swanetše go dira. Ga ke tsebe, ke le kwele, eupša ga ke tsebe.

193 Gomme gohle go kgabola letšatši. . . Lehono ke tšere morwa wa ka yo monnyane, Joseph, re ile lebopong la lewatle, ke emišitše koloi ka leribeng le lennyane, gomme ke rile, “Joseph, bapala ntle kua, ke swanetše go ya godimo mo ka leribeng.” Gomme ge. . . Ke rile, “Modimo, O hlokomela morwa wa ka fale, gore a se tsene ka go maphotho ale.” Ke ile godimo go bolela le Yena.

194 Ga se nna modulathoko, eupša o ka se kgone go ba mohlanka wa Modimo le mohlanka wa setšhaba. O ka se kgone, ntle diphathing le go ya pele ka mokgwa woo, gomme wa no letela go dula. . . o swanetše go ipea wenamong go Modimo, gore o kgone go thuša setšhaba. Gomme seo ke se ke lego mo ka sona, ke go le thuša, ga se ka tlela botsebalegi mo. Gobaneng, o tsebile ke šikologa dilo tše bjalo! Gomme ke a tseba gore ga ke selo.

195 Ga se ka tla fa bakeng sa tšhelete. Gobaneng, ka kgontha aowa! Ga se ka tla fa gobane ke be ke se ne mafelo a mangwe go ya, ke tlile fa gobane ke ikwetše ke hlahlwa go tla fa. Ke na le ditaletšo tše makgolotshela goba go feta go tšwa mošwamawatle le dilo, Banna ba Kgwebo ba Bakriste go tšwa mogohle, makala go beakanywa lefaseng tšekelele, tsela e lefetšwe, se sengwe le se sengwe. Ga ka swanela go ba le tšhelete, mogohle ke yago, ba. . . ba no lefa. Banna ba Kgwebo ba nyaka go nthomela felotsoko, dinako tše dingwe ba šomiša masometharo, ditolaro tše dikete tše masomenne ka ngwaga ba nthomela mafelong, gomme ga ka swanela go ba le peni.

196 Ge ke nyaka go. . . Ge Modimo a nthoma moo go no bago batho ba bahlano goba ba tshela, ke kgona go ya, ka dula go fihla A mpotša go tloga. Le a bona? E sego ka tlase ga boikarabelo, feela go Modimo. Ka gona ke swanetše go hwetša, “Tate, ke dira eng mo? O nnyakela eng, nna mo?”

197 Jesu o ile godimo Sikara, O be a le tseleng ya Gagwe go ya Jeriko. Gobaneng? Tate o nno Mo romela godimo kua. Bjale, go ya go direga eng go latela? Mosadi šo o tšwela ntle, kafao O nno bolela le mosadi, O hweditše se e bego e le sona, gomme toropokgolo ka moka e dumetše go Yena.

198 Bjale, O fa bošegong bjo. Gomme le a e dumela, le se belaele. O dumela ka pelong ya gago gore Jesu Kriste ke Morwa wa Modimo, gomme O tsošitšwe go tšwa bahung le go rotogela godimo, morago ga go tlaišwa le go bapolwa ke Pontio Pilato, le go bolokwa le go hwa ka lebitleng matšatši a mararo, le go tsoga, le go rotogela godimo, gomme o dutše ka seatleng se setona sa Bogoši go Modimo, bošegong bjo. Yena ke Moprsta yo Mogolo yo a phelago, a phela ka mehla go dira dipoelano godimo ga boipolelo bja rena, le Moprsta yo Mogolo yoo a kgonago go kgwathwa ke maikutlo a mabofokodi a rena, wa go swana maabane, lehono, le go ya go ile, ka tshepišo ye nngwe le ye nngwe le dilo tše A di dirilego go tšweletšwa gape ka Kerekeng.

199 Ka morago ga ge bojane bja Roma le mogokong di O jele, O tshepišitše O tla bušetša, go rialo Morena, ka matšatšing a mafelelo, O tla O bušetša thwi morago gape, Mohlare Monyalwa wola.

200 O be a le Mohlare, Mohlare wa Bophelo go tšwa serapeng sa Edene, e lego, mosadi o be a le mohlare wa lehu, phapošo, seo ke se se ba dirago go dira ka tsela ye ba dirago lehono. Selo ka moka e bile phapogo, go dira ka tsela yeo.

201 Go bothata kudu go tla godimo kgahlanong le yona, eupša o swanetše go ema, yo mongwe o swanetše go e bolela. Nnete. O tla tsebalega kudu ge o se wa e bolela, eupša ke mang a yago go e bolela? Yo mongwe o swanetše go bolela se sengwe ka yona, gobane Modimo . . . gona e ya go ba, ba na le boikarabelo nako yeo ka Letšatši la Kahlolo. Eupša ge ba se ba . . . ge ba e kwele gomme ba e hlokomologa, go tšwa go bona. Eupša bjale, go e kwa, go sepela ka go yona!

202 Bjale, a nke Moya wo Mokgethwa, Yo ke mo emelago fa bošegong bjo, magareng ga mmele wa Kriste, a nke A tšee poifo ye nngwe le ye nngwe le pelaelo go tloga go wena, a nke A tle tlase fa bošegong bjo, feela boka A dirile bošegong bjola godimo ga lewatle gomme a re, “Se boifeng, Ke Nna, wa go swana maabane, lehono, le go ya go ile.”

203 Leswao lela le be le swanela bjang! Ke be ke sa tsebe le be le le fale go fihla bošego bja go feta; ba le tlantše godimo fale. O a swana maabane, lehono, le go ya go ile. Bjale, o e dumela ka pelo ya gago yohle.

204 Ke nyaka go le botšiša se sengwe. Ge A ka e dira bonnyane, nako e tee e swanetše go ba go lekanela, eupša makga a mabedi, gatee goba makga a mabedi, ka moagong wo bošegong bjo . . . Gomme ga re ka ntle . . . Ga go bjalo ka maleatlana tsoko a maso ka tlase ga poto tsoko ya ouiija felotsoko, re thwi fa ka tlase ga dietša tša tabarenekele ye, re thwi fa ka tlase ga . . . se sengwe le se sengwe se robetše se bulegile fa, ka Bogoneng bja Modimo, le sefahlego sa mokatšobokano, le Beibele ya Modimo *fa*, e bega gore e tla direga. Fao ke mo tumelo ya ka e emego, thwi fao, gore O e boletše. O e tshepišitše, gomme ke a tseba O tla e dira.

205 Morongwa yola, ge A kopane le nna bošegong bjola godimo fale, gomme Seetša sela se dikologa go kgabola fale, gomme O mpoditše dilo tšeo gomme o rile, “O se boife. Bjale, go tla direga *se*, gomme morago go tla direga *sela*,” bontši bja lena le elelwa ge e profetilwe, še yona. Bjale, ke le botša therešo, Kriste o fa, gomme le šetše le fodišitšwe, yo mongwe le yo mongwe wa lena, yo mongwe le yo mongwe o phološitšwe, eupša o swanetše go e amogela bakeng sa yona go go direla e ka ba eng. O swanetše go e dumela, le go e tšea ka go ya gago mong . . . “Ke ya ka.” Poreisi e lefilwe, o no swanela go e dumela.

²⁰⁶ Bjale, ge A ka e dira, ke ba bakae ka fa ba tla rego, “Ka mogau le thušo ya Modimo, ke tla e amogela bošegong bjo, bobedi bakeng sa Mophološi wa ka le Mofodiši wa ka?” Phagamišetšang diatla tša lena godimo gomme le re, “Modimo, ke e ra go tšwa botebong bja pelo ya ka, ke tla e dira.” Modimo a le šegofatše, go lebega o ka re diphesente tše leggolo go dikologa mogohle. “Ke tla . . . Ke a e dira.”

²⁰⁷ Bjale, re na le mathata, le a tseba ke na le ao, gomme ke lwa thata kgahlanong le wona. Eupša Modimo o tla putsa seo, le se ke la no tshwenyega ka seo, le a bona, ka mehla go bile.

²⁰⁸ Ke a elelwa, mo e sego kgale go fetile, mothaka o tlile, a hirilwe ke sešole, a tla godimo go mphefeanya. Le elelwa kopano. O dutše ntle kua, gomme ke tšwetšepele ke ekwa moya wa go se tlwaelege felotsoko, ke lekile go o hlokomologa, gobane dilo tše dintši kudu di dirilwe, tše mpe. Ke nno se bolele selo, ke ile pele nthatana gannyane. O nno tšwelapele a e dira. O be a tla ya ka go—o be a tla ya ka dikampeng tša sešole, le go dira bašemane go gobola boka mpša, le go kitima go dikologa go tša bona. . .

²⁰⁹ Moya wo Mokgethwa o nno ntšea, ga se ke kgone go bolela gape, ke rile, “Wena ngwana wa diabolo! Gobaneng o tlile go tsenatsena kopano ya Morena? Modimo o tla mekamekana le wena.” Gomme o golofetše ge e sa le go tloga nako yeo, kafao . . . O rometše lengwalo ka morago ga lengwalo, gomme o boletše *se, sela*, le *se sengwe*. Ke rile, “Ga ke ne selo go dira le yona, Mohlomphegi. Ga se nke ka e dira. Sokologa! Ke selo se nnoši nka kgonago go go botša. Seo se godimo gare ga gago le Modimo.”

²¹⁰ Bjale, ke tšeela moya wo mongwe le wo mongwe ka fa ka tlase ga taolo ya Moya wo Mokgethwa, Wo o ntlotšago bjale, Leineng la Jesu Kriste. A nke letago la Modimo le phadime go kgabola, le go netefatša, ga go kgathale se ke se bolelago . . . Nka kgona go aketša, ke nna motho, eupša Modimo a ka se kgone go aketša, Yo a e tshepišitšego.

²¹¹ E no ba ka thapelong, e no re, “Morena Jesu, monna ga a ntsebe, eupša re a botšwa gore O ya go romela se. Ke bile fa bošego ka morago ga bošego, gomme ke purupuditše Mangwalo, ke therešo tlwa.” Gomme ke leswao la mafelelo le re yago go le amogela go tšwa go Modimo, go fihla Mollo o ewa, go no swana le ge go bile ka Sodoma gore Jesu o tshepišitše, gomme o rile re . . . seo ke selo sa rena sa mafelelo, leswao la mafelelo. Gomme yeo ke therešo. O no maraka lentšu la ka ka pukung ya gago felotsoko gomme o hwetše gore yeo ke therešo.

²¹² Lebelelang ka '46, se E se boletšego ka Billy Graham a bowa, le ka moka ga bona le go ya pele, tsošetšo, le se se tla diregago. Dipeu tša kerekeleina di bjetšwe, gomme seo ke se puno e tla bago sona, gomme seo ke tlwa se e lego sona.

²¹³ E nong go dula go homola ka kgonthe. Yo mongwe le yo mongwe wa lena ke moya. Ge o sepela . . . Nnete, ge o se moya,

gona o hwile. Le a bona? Moya wo o tutuetšago bophelo bja gago, morethetho go tšwa moyeng, ke tlwa se Jesu a bego a bolela ka sona ka mosadi, ge A bone Bafarisei, gomme a bone se se bego se le ka pelong ya bona, gomme a kgonne go ba botša; ba be ba nagana O be a le Beletsebubu. Magoro bobedi ka mehla a kgauswi, ka mehla a kgobokane mmogo.

214 Fa go dutše mosadi, godimo fa go la ka le letona, o a rapela. O a rapela gobane o ne sešo mo mokokotlong wa gagwe. O na le karata ya thapelo? Ga o nayo. Ga o hloke e tee. A re basetsebane seng sa rena? Re basetsebane. Phagamišetša seatla sa gago godimo gore batho ba kgone go bona. A bjoo ke bothata bja gago? Go lokile, o dumela Modimo, selo se tla tloga. Amene. Ga ke mo tsebe, ga se nke ka ke ka mmona, Modimo o tseba seo.

215 Mosadi yo monnyane šo, o dutše thwi ntle mo, o apere mohuta wa roko ya go lebega botala, hlogo ya gagwe fase, o a rapela. O na le bothata bja pshio. Ge o dumela ka pelo ya gago yohle, Kgaetšedi, Modimo o tla go fodiša bothata bja pshio. O a e amogela? A o na le karata ya thapelo? Wena, o na le e tee? Ga o e hloke, bothata bja pshio ya gago bo go tlogetše.

216 Ke hlohla mosedumele e ka ba mang go mpotša se mosadi yola a se kgwathilego. Ga se a tsoge a nkgwatha, eupša o kgwathile Moprista Mogolo yola a kgonago go kgwathwa ke maikutlo a mabofokodi a rena. Ya. Ge o dumela ka pelo ya gago yohle! Amene.

217 Bjale, e thomile go sepela mogohle. Leswiswi lela le thomile go šuthela morago. Le be le tebile gabotse go dikologa mo motsotso, eupša le sepelela morago.

218 Mo go dutše mosadi pele ga ka, o tlaišega ka ditlhakatlhakano. Ga ke go tsebe, Mohumagadi, eupša o na le aletši, a ga o nayo? O a dumela gore Modimo o tseba gore o mang? Ge nka bolela leina la gago, boka Jesu a boditše Simone Petro, a o tla ntumela go ba mohlanka wa Gagwe? O tla dira? Mdi. Holt, dumela ka pelo ya gago yohle, gomme o ye gae, gomme o fole.

219 A le a dumela? Šetšang. Le lebelelang. A ga le kgone go bona Seetša sela? Lebelelang fa, Se thwi godimo ga monna a lebeletšego thwi go leba go nna, a dutšego thwi morago fa.

220 O rapediša mosadimogatša. Yoo ke wena, Mohlomphegi. O na le karata ya thapelo? Ga o nayo. Emelela ka maoto a gago. Ge se sengwe se sa direlwe mosadimogatša wa gagwe gonabjale, o tla hwa, o tlaišega ka kankere. Yeo ke nnete. Ga o tšwe mo, o tšwa kgole go tloga mo, o tšwa toropongkgolo ye e bitšwago Fresno. Yeo ke nnete. O a dumela Modimo a ka mpotša ke wena mang? A e tla go thuša go dumela? A e tla go thuša? Mna. Matthew, dumela ka pelo ya gago yohle, eya morago gae.

221 Ke hlohla mosedumele e ka ba mang, mpotšeng ka fao seo se dirwago, ka ntle ga maatla a Ramaatlakamoka Modimo. A le a

e dumela? Gabotse, le se boife, yoo ke Kriste, feela tlwa se A se boletšego. Bjale, a le a e dumela?


²²² Bjale, ke go neela go Kriste, Yo a lego gona mo. Ge o ka e dumela ka pelo ya gago yohle, le go e amogela godimo ga mabala ale, o ka kgona go fodišwa, o fodile thwi bjale. Ke ba bakae ba e dumelago ka pelo ya lena yohle, ntle le bokgojana bjo bo itšego, bakeng sa phološo, bakeng sa phodišo ya lena, bowena bja mmele wa gago, gomme o tla dumela Modimo bophelo bja gago ka moka, gomme o tla Mo amogela thwi bjale?

²²³ Bogona bja Gagwe, Ke Yena, Selo se nnoši seo se ka go thušago, e dumele gomme o eme ka maoto a gago, o re, “Ke ema thwi bjale, Leineng la Jesu Kriste, go e amogela.” Motho yo mongwe le yo mongwe yoo a dumelago, ema ka maoto a gago.

²²⁴ Beanang diatla seng sa lena bjale, beanang diatla seng sa lena. Beibele e rile, “Maswao a a tla latela bona ba ba dumelago,” go beng gore o bile modumedi, ge o le modumedi bjale, Beibele e rile, “Maswao a a tla latela bona ba ba dumelago, ge ba bea diatla tša bona godimo ga balwetši ba tla welwa ke maruru.” Feela tlwa boka go sokologa, le go kolobetšwa, ke go obamela taelo ya Modimo. Bjale, rapelelanang seng, feela ka tsela ye le rapelago ka kerekeng ya lena. Rapelelanang seng, ge ke le rapelela go tšwa go sefala se—go tšwa go sefala se.

²²⁵ Tate wa Legodimong, ke dirile sohle se ka taelo ya Gago, ke se dirile feela ka tsela ye O rilego e dire. Gomme ke rapela Wena, Tate wa Legodimong, gore Leineng la Jesu Kriste, gore O tla hlompha dithapelo tša batho ba, tumelo ya bona, matsapa a bona.

²²⁶ Sathane, o lahlegetšwe ke ntwā, o sephedi se se fentšwego. Tšwela ka ntle ga batho ba. Leineng la Jesu Kriste, ba tlogele, gomme o tšwele ka ntle ga bona.

Gomme fodišwang yo mongwe le yo mongwe. 

62-0629 Se Boifeng, Ke Nna
National Guard Armory
Santa Maria, California U.S.A.

NORTH SOTHO

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriste. Puku ye e ka se kgone go rekišwa, go tšweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditšhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org